

Ta
Tung 大
同

中華民國郵局特准掛號認為新聞紙類

民國四年六月十五日發行

每月一册

編輯所 上海北四

川路一百四十

三號

冊六第年四國民

南京圖書館藏

本報改組月報廣告

本報自甲辰年發刊以來迄今已逾十稔久蒙社會所獎許惟本報素抱大同主義內容完備議論平正其發行本意實以貫輸智識扶助道德爲志願初非意存牟利故譯輯印刷紙張鑄版莫不精益求精需費頗鉅近因歐戰影響工料加增故不得不從事改組自民國四年正月爲始改爲月報每月一冊全年十二冊每冊大洋二角定閱全年連郵費減收二元本報主任莫安仁君甫由歐回華搜集材料至爲豐富并聘請名人襄助譯著一切內容大爲擴充每期至少七八萬言約區撰論譯論評論譯林紀事文苑小說筆記插圖公文其譯著各篇皆於現世最新之理論中國最要之計畫相關復徵求海內文豪訂撰救時偉論必期貫徹本報所具之志願益求完美以副愛讀本報諸君之期望倘海內文學家慨以論著詩歌及最新之攝影見示經本報刊登後當必從優酬潤如蒙定閱全年務乞先期惠示空函恕不奉覆專此佈告諸惟

公鑒

上海大同報記者敬啓

發行所河南路四百四十四號
編輯所北四川路一百四十三號

Ta Tung Pao

Vol. XXI, No. 6

June 15th, 1915.

Third Series

Principal Contents

Illustrations:—

Queen Elizabeth of Belgium
General Joffre, Commander in Chief of the French Army.

Leading Articles:—

Resurrection HopesEditorial
The Independence of the Judicature "

World Topics:—

A letter.....Liu Ting
Japanese Views.....*Japan Mail*
The two Patriotisms (*To be concluded*) Bishop Gore
Six months of the War, The French Official Review (*to be concluded*).
Should Neutrals sell Ammunition to Belligerents
(*Concluded*).....Prof. Greyory
Russia after the War.....*Outlook*

Critique:—

Three letters from Contributors

News:—

Home and Foreign

Translations:—

Philosophy (6) Nietzsche's view of Morality
Politics:—Prohibition in Russia.....*Outlook*
India: Political ReformJ. Chailley
Social Programmes of the West
(*Continued*).....C. R. Henderson, Ph.D.
Biography:—Lord Lister, Chap. VIII.
Religion:—The Commandments of JesusR. F. Horton, D.D.
SinC. E. Darwent, M.A.

General Knowledge:—

The feeding of Calves.....*British Board of Agriculture.*

Poems

Miscellaneous:—

Russian relief in war time.


Journals of Famous Chinese.

PUBLISHED BY

THE CHRISTIAN LITERATURE SOCIETY,
143 North Szechuen Road, Shanghai.

Address all communications to the editor, EVAN MORGAN.

Price \$2 per annum; 20 cents per copy. Payment to be prepaid by cheque or postal order,
not in postage stamps.



大同月報民國四年第六册目錄

第一卷第六號即十一年第五百五十一期

圖畫

比王后教授太子讀書圖
法國霞飛將軍肖像

論著門

社論

振興之希望
司法獨立問題

外論

與張純一言神道書
五月七日後日人之言
狹義愛國與廣義愛國

歐洲半年中之戰爭
中立國售賣軍用品問題

歐戰後之俄羅斯

熊升恆致友人書

紀錄門

中國大事記

中日新約之正式簽字

王鴻猷之忠言

蘇粵贛三省鴉片煙之通行

救國儲金

遠東運動會第二次大會

外國大事記

歐戰近聞

各國近信

命令

策令三道

申令二道

批令五道

文牘

都肅政使等救亡呈文並申令

譯述門

哲學類

德國哲學家赫奇學說之概要 (續)

政治類

俄國之酒禁 (續)

英國治印問題 (續)

改良社會策 (續)

傳記類

李司特耳傳略 (續)

宗教類

基督誠命 (續)

第四章 人格

惟四體不覺有一法與吾心之法戰執我從四體之惡法

智叢

飼積記

文苑

一誠齋詩存遺稿

問高齋詩存

雜俎

俄國戰時之救濟事業

筆記

仰亭攀柏居筆記

莫安仁

王荳生譯

莫安仁 徐維岱

衡德森 鍾春暉

莫安仁 哈彼泉

莫安仁

邵寄園譯

王調生譯

許傳需

許家愷

王調生譯

許傳需

雜纂門

比王后意大利薩白氏教授太子讀書之圖



比王后意大利薩白氏。本德國巴維愛娜王之女。體弱。好讀書。不樂與人接見。自戰事起。主持救護事業。盡心保民。躬臨醫院。夙夜不怠。視前判若兩人。此圖爲其教授太子讀書之圖。後所懸者。卽學校用之黑板云。



法國霞飛 General Joffre 將軍。生於千八百五十二年。父爲工人。將軍幼而從軍。忠誠愛國。千八百七十一年。普法戰時。方任微秩。歷升至今職。爲法國軍界之首領。法人服其才。且重其人。常稱將軍爲『吾之霞飛』云。將軍曾到中國及安南台灣非洲諸地。疊著勛勞。法國極貴之寶星都有之。性謙和。儉樸無嗜好。勇敢有爲。法自改民國。未有稱大元帥者。今將錫以此號。俾其爲民國第一大元帥。可見將軍威望之尊崇矣。



論 答 門

社 論

振興之希望

莫安仁

當茲春夏之交。吾人博觀萬類。繁育滋生。一洗冬季萎敗之氣象。若草若木。若禽若獸。若鱗介若昆蟲。罔不發達茂盛。有忻悅之容。無愁苦之色。斯豈驟然及茲哉。當零落蟄處之時。蓋已有爭榮競茂。發育長養之機矣。吾人依此物理。以論人事。竊以人值憂患困苦之時。應有振興之希望。不特振其一身。且須振其腦。振其心。不但興彼小體。且須舉大體。而興之人。必如此。而後憂患可除。困苦可免也。今論振興之希望。分對於事。對於人。兩項言之。略陳於次。

先就對於事者言之。振興之希望。範圍綦廣。茲但言政治一項。中國近歲。譬若草木之於冬季。萎敗之氣象甚多。不圖振興。勢將長處。冬季之境界。至於歐洲。萎敗氣象。較中國為尤甚。無數青年有用之身。有平日為兵者。有向未為兵而為學界商界有名之人。現均犧牲生命。以保其國。比利時固有之疆域。祇存一

隅。以。土。地。言。礮。彈。所。加。平。坦。之。地。美。麗。之。城。立。歸。破。壞。以。家。室。言。丁。男。赴。軍。嗣。續。斷。絕。者。不。一。其。姓。吾。人。觀。此。狀。態。今。之。戰。爭。譬。若。猛。獸。幾。將。文。明。食。盡。歐。洲。同。胞。若。不。發。奮。振。作。求。所。以。振。興。之。策。則。憂。患。困。苦。何。日。而。止。乎。

吾人言振興之希望。希望非自然而成者也。必先以事功爲之根本。斗室枯坐。憂愁歎息。不足以言事功。卽無希望可言也。各國今日舉國一致以圖勝敵。俄國往日虛無黨。反對政府。今則上下一心。整軍保國。德如是。法亦如是。老婦孺子。均盡心於戰事。巴黎戲園。停止演劇。鐵路電報等業。均由婦人任之。英不願德之強霸。寧與敵偕亡。不容敵勝利。舉國同仇。以禦強暴。英夙以海軍著名。陸軍精而不多。戰端一開。投身軍旅者。達一二百萬。夙昔家居之貴婦人。亦赴法國。任救護之事。往日英國政黨分立。開戰以後。黨見悉除。近數日。民黨偉人。同入內閣。厚其勢力。足徵全國上下一致禦敵矣。當此之時。一方抱克敵致勝。不達目的。不止之志氣。一方盡心竭力。以求事業之振作。則振興之希望。何難成功乎。前者人言礮臺之失敗。由於飲酒。俄政府聞之。因勵行禁酒之令。法如是。英亦如是。譬如賽跑。衣服累身。則去之。飽食不便。則減之。種種經營。總期使希望成功。而後已。則今雖憂患困苦。其必終有振興之日。蓋可知也。

吾人論歐洲之事。如此。吾人尤望中國舉國一致。力圖振興。中國振興之機會甚多。若能同心合力。經營振作。則後日之富強。可操左券。惟望中國實心進行耳。

右言對於事之希望。惟事業之興。以人之心思腦力爲本。故對於人之希望。亦極重要。茲再言之。

對於人之希望。範圍亦極廣大。言其重者。卽智識之開通。辦事之認真。道德之完全。三者是也。社會之中。有三者無一之人。中國往日風氣未開。今則開通者多矣。辦事認真與否。吾等局外之人。未克深悉。惟有敢斷言者。認真乃必不可忽者也。舉例以明之。法國陸軍次長管理軍糧。前者次長某營私舞弊。將軍餉贈其私識之婦。以致虧空國帑甚多。幸爲法政府發覺。按律處刑。設使未卽發覺。則其爲害可勝言哉。辦事不知認真。譬若蠹蟲於木。根本之患。無論一人一國。有此。則希望卽難成功矣。

至於道德一項。關係尤爲重要。就淺者言之。人當憂患之後。雖極困苦。而能不至一敗塗地者。以有道德振作之也。中國人心不古。已歷多年。然至今未滅亡者。以有道德維持之也。中國之事。吾人未能深論。試言西國。西國有一理想。足使人衰敗之氣發達而復振興者。卽人人所重。四月間之天明節。五月十日之白日節。是天明節代表基督由死復生。白日節代表基督歸於天國。操感化衆生之權。俄國逢天明節。男子相見。不問認識與否。俱行接吻禮。言「吾人之基督復生」。斯卽互相安慰。而爲希望之根本也。他國於天明節所行之禮。雖與俄異。而尊重之心。則一。故謂西國扶持道德。具至大之感力。卽由有此理想。亦無不可。此理想與人之自修。亦有關係。人能修身。乃有精神。任事而智識之開通。亦卽生於其中矣。歐洲今日居黑暗之境界。吾人謂其有一線光明。照入者。卽此理想是也。比利時後日。亦將因此理想而

得恢復兵凶戰危雖極危險惟以此復生之理想爲之感力則值衰敗之日亦有振興之希望有此理想可使仇敵怨恨之心漸歸融洽可使社會文明之紊亂整頓完全今之出征遠域及家居流淚之人皆因此理想而存振興之希望其意若曰基督由死復生死者必能復生各國語言雖各不同而具此心則一表面爲敵實則受同一之感力上帝恩德感化衆人當今之時復生之說感人之效力綦大凡智識之開通辦事之認真道德之完全皆與此理有密切之關係吾人所謂對於人之希望者有如此

吾人此論不特爲歐洲言之對於中國亦抱同一之觀念吾人深懼中人謂此理想非中庸之道歐洲實行此說影響極巨助人者亦極多奉勸中國諸君務深思而詳察之上帝之恩德普及世界不獨歐人受其感化中國人民亦同有受此感力之幸福吾人試觀基督當日依從天父之命令在世之時雖被不法之徒置之死地而其死時卽已超脫衆生升入天國一方死亡一方由死復生斯可知誠能真心求之則人人同得受此無盡之感力也

總之今日世界如許競爭如許苦難而人猶有才能生存於世此才能者卽上帝賦與之者也吾人竊以不但競爭之時應求勝利尤宜希望前途達振興之目的吾人彷彿聞上帝訓人曰「爾勿畏亡亡必復活」嗟吾同胞其聆此語而希望振興乎寤寐祝之旦夕望之矣

司法獨立問題

庸齋

司法獨立一語自人言之所謂審理訴訟特設專官不令行政官參預者是自法言之所謂審理訴訟一依成法不受法律以外之權力干涉者是孟德斯鳩氏之言曰「使司法權與立法權合則斷曲直者卽爲議法令之人如是則是非無定而民之性命財產舉以危矣使司法權與行政權合是行法令者卽爲審是非之人如是則斷獄者可濫其淫威而獄之鍛鍊周內者衆矣」歐美文明國實行司法獨立制度類於憲法特立專條垂示久遠規國家者定文明程度之高低恆以司法獨立與否爲標準倘非病狂失心甘居下流罔敢倡言司法獨立之不可行者誠以保障人權除專制之積弊以司法獨立爲最重要也中國司法獨立之議倡自十年前庚戌秋舉行第一次法官試驗而各省省城商埠審判廳亦相繼成立是爲此制度初興時代辛壬之間民國成立東南各省勵行司法獨立制度江蘇六十縣未設審判廳者祇三二縣外此各省亦皆竭力籌設蓋一時政界於審判廳祇有添設未有敢言裁撤者斯爲此制度最盛時代未及一年方針改變向之主張籌設者羣趨於裁撤之一途以司法衙門最多之江蘇不及兩載祇存南京上海地方廳各一所他省更無論矣今者各省審檢廳之多寡與辛亥春夏間彷彿而其爲人忌嫉遭世詬病乃遠過於辛亥倍蓰焉乎果司法獨立不宜於中國與胡五年之間甫見萌芽倏遭摧殘一至於斯也

論者曰今者司法之不能獨立由於財政之困難人才之缺乏是固然矣雖然以言無錢今之庶政事事

皆然他政無錢未云裁減何獨於與人民有直接關係之司法獨勵行減政主義也是知財政困難雖爲不能普設審檢廳原因之一而究不足爲重大原因也以言無人記者亦深慨今之法官多不稱職然政府慨人才之缺乏則應從事教育多方培植所謂積極進行不可徒抱消極主義也而今日者法政學校有減無增培植法官之舉寂寂乎毫無所聞是知根本原因又有在彼而不在此者矣記者默觀詳察竊謂司法獨立制度之受排斥有內因有外因者由司法界以外發生之反對原因也內因者由司法界以內發生之反對原因也由司法界以外發生之反對原因人數之多聲勢之大已足推倒司法獨立制度而有餘裕更有司法界以內發生之反對原因貽人口實內外交侵譬若孱弱幼童不自保重多方戕賊又有強暴羣起毆打則其不可生存於世亦固其宜烏乎今之司法制度何以異此

先言外因社會之中反對司法獨立者約分六類

(甲)州縣 民國省制有縣無州茲言之州縣指人言非指地言卽所謂昔日之知縣知州是也清季以官爲市州縣缺分之肥瘠漕忙陋規而外以審理訴訟爲利源之大宗貪黷之徒賄賂公然貪贓枉法是不必論卽非枉法受賄而因審理訴訟收狀有費請求急迫處分如請求類有費訊案掛號有費考代書有費差役卯名有費囚糧有費蓋雖清廉之吏於此諸款亦尠拒絕不收者自司法獨立知事不理訴訟以人情言好逸惡勞不兼司法宜爲知事所忻悅而各縣知事於此無不嫉首蹙額歎今之官不如往日

是其心理上之現象。可想見矣。不兼司法。即少若干收入。時時以復得此收入爲念。則處心積慮。思所反對。審檢而無微不至也。詎可以楮墨形容耶。此司法界以外發生之反對原因一。

(乙)刑幕 往日訴訟名爲州縣審理。而實由刑幕主之。各省刑幕植立。徒黨渠魁居於省署。省內各署之幕友。非其親朋。卽其弟子也。不如是者。其署所辦之案。必遭駁斥也。記者曾見提法使署幕友核外縣之案件。其駁斥者。皆其縣之幕友。不與同黨也。誠爲同黨。雖極違法。亦必爲之彌縫。其不可彌縫者。則私將卷宗發回。改正使之。換卷詳報。故其縣所用之刑幕。果與省幕一氣。則人民上訴之案件。其能更正原判者。蓋絕無之事也。官吏之聘刑幕。刑幕之助官吏。皆爲保官而非保民。闖茸之吏。不嫻律例。遇事假手幕友。幕友權力之大。不必論。卽精明之吏。而遇幕友有勢力者。有時亦須唯命是聽。不敢違拗。刑幕勢力若是。故一方受官吏之倚重。一方施威福於人民。權柄愈大。收入愈豐。全國恃此爲業者。不知幾千百人。一旦司法獨立。州縣不理訴訟。無所謂刑錢。老夫子之聘請審檢廳之推檢。又非刑錢所得。插足以往。日居爲奇貨。莫敢違抗之人。忽遭社會之排除。等諸廢物。其心中不平。不惜百出其計。以圖反對者。當如何耶。此司法界以外發生之反對原因二。

(丙)書差 州縣審理訴訟所用之人。有掌寫狀而稱代書者。有掌錄供而稱招房者。有掌卷宗而稱經承者。皆所謂書吏也。有稱捕快者。有稱刑皂者。有稱壯班勇丁者。皆所謂差役也。每縣之中。兩類之人多。

者逾千少亦數百公中不給分文而羣以衙門爲一家生活之源則其舞弊而虐民也可想見矣司法獨立此類之人半歸淘汰思舊制之利便恨新章之發生酒樓茶社興謗造謠能力雖微傳佈實廣此司法界以外發生之反對原因三

(丁)訟棍 非官吏非律師而日預聞訟事者訟棍是也平日以鄉董或土豪之資格出入公門高者與幕友交游下則與差役徵逐愚氓訴訟倚此輩以通聲氣大抵無一訟案無此輩爲之主謀是以此類之人終歲經營幾無休息自司法獨立人既不同法又改變平日所倚賴而居奇者一旦盡失其效力馨香禱祝惟在審檢廳之裁撤此輩技倆首在捏名稟揭省署之中控告法官之訴詞此等人之手筆最占多數此司法界以外發生之反對原因四

(戊)省吏 往日省吏總攬一省政權官無大小事無鉅細悉得管轄而干涉之司法獨立法官直接中央不屬省吏之管轄好事者於此既覺威令不及不勝忿恨之心即在賢者而見法官違法竟無權以干涉因愛民之心而忘越權之戒此則賢者亦有不免至聞外國行政官違法亦須對簿公庭方面之尊或受初級法官之審判則爲自利計尤以司法獨立爲期期不可者此司法界以外發生之反對原因五

(己)紳士 地方紳士有以納賄說項助人訴訟爲事者名雖紳士實則訟棍非記者所稱之紳士也今所論者專指公正之紳士言之平日安居鄉里不入公門惟因自己偶有事件向以資望得以片言關照

者對審判廳。須照章遞狀。與平民無異。此不快於心者一也。親族之中。與人訴訟。偶爾敗訴。聽一面之陳述。疑審判之偏枉。其不快於心者二也。總此二端。雖未嘗公然反對。然提唱司法獨立之心。自必爲之減少。此司法界以外發生之反對原因六。

六類之人。其反對之程度。不必相同。然或居顯位。或負重望。或窟宅於衙署。或把持於閭里。各方鼓吹。勢力之厚。蓋可知矣。於此主持司法之人。倘能克己自修。實心任事。則難與圖始者。或終有樂成之期也。而孰知又有不然者。再就司法界以內發生之反對原因言之。

(庚)法官。數年來。廁身司法界者。非無執法無私。清慎從事之人。然守法者未及二三。枉法者幾居七八。守法者。循猷未著。枉法者。惡聲已揚。爲推事者。有文理未通。批示判詞。令人難解者。有不明法理。引用條文。悖戾原意者。有積案經年。不予判決者。有任意移轉管轄。使當事人疲於奔命者。有設法遏抑。上訴致人含冤。莫伸者。爲檢察官者。有畏避豪強。坐視罪犯。匿不舉發者。有徇庇故縱者。有架誣敲詐者。有與審判官聯合於應上訴之案件。而不上訴者。爲書記官者。有於書狀時。勒取規費者。有濫改供詞者。自廳長以至各員。游蕩徵逐。肆無顧忌。甚至串同。厮役朋比。受賤枉法。虐民視舊。日州縣有過之。無不及。則安貴此司法獨立爲也。此司法界以內發生之反對原因一。

(辛)律師。律師制度。保障人權之良法也。中國自行此制。登錄而執行職務者。千數百人。內中嫻習法

例誠實辦事者雖不乏人然就大多數言之法律不熟事理不明皇惑其詞支離蔓衍徒爲事實之爭執不計法理之所歸是曰事師非律師也顛倒是非捏造玄素搖唇鼓舌濤張爲幻無理強稱有理小事釀成大事是曰訟師非律師也與廳長推檢往來徵逐不事當庭之辯論徒爲暗室之商量賄賂公然罔知法律是曰劣紳非律師也至於學識譎陋腦筋不靈但知受錢未堪辦事雖無積極害人之動作而消極誤人爲害亦多是曰庸醫非律師也綜計三年以來律師違法害人之事蓋不知幾百十件而社會之人以爲此律師制度之不善凡爲律師者俱若是也羣集矢於律師而司法獨立乃益爲人詬病此司法獨立以內發生反對之原因二

(壬)書記承發吏司法巡警等 審檢廳成立書吏員役雖均照章考用惟由舊日書差冒充者仍屬多數平日辦案積習未改欺凌愚懦詐索金錢人民見其貪暴不法忘其沿往日州縣衙署之舊習而祇稱爲審判廳之弊竇而司法獨立之有害無益乃徧傳於社會矣此司法界以內發生之反對原因三

(癸)法律 新律條規有與舊日習慣不合者例如父殺子照常論罪無夫姦不論罪買賣人口解釋不明均爲庸俗極端訾議之點此外法例中易滋流弊之處如不許告訴人上訴刑量之伸縮力太大審理期限之未定種種因法律而生之弊竇論者不推原於法律祇歸咎於審判廳之判詞而攻擊司法獨立之話柄乃日益多此司法界以內發生之反對原因四

綜上十因。外界之攻擊。如彼。內部之腐敗。如此。則司法獨立制度之不可存在。蓋勢有必至者矣。邇者縣知事兼理訴訟。州縣之利權。復刑幕之目的。達差役訟棍之財源。再興省吏紳士之威信。復著故近之知事。審理案件。縱極違法。縱極貪暴。而議者無人焉。地方審檢廳。各省之中。祇省城商埠有之。而省城商埠之縣知事。有越權受理訴訟者。司法衙門亦不敢多與爭論。蓋司法獨立之能力。譬懸千鈞於一髮。危歟。殆哉。將歸消滅也。且夕之事矣。迴憶庚戌籌備之景况。改建民國。轉令斯制。日形頹敗。是豈中國人民不應享司法獨立之幸福耶。抑司法獨立制度之本未盡善也。記者深信司法獨立為惟一之良法。深信保障人權。除專制之積弊。非司法獨立不可。然記者崇拜司法獨立為其足以保障人權。若近日審檢廳之營私舞弊。蹂躪人權。則雖夙昔崇拜司法獨立。如記者亦不忍為此等審檢廳辯護。謂其與民有益。按今日之情勢。司法獨立未足以云建設。惟力圖預備可耳。今之訴訟。既由縣知事審理。記者竊以居今日求所以保障人權。應以改良縣知事審理訴訟章程。及普及人民之法律知識為第一事。非記者不贊成。今日多設審檢廳。勢有不行。且不求其本而徒事末務。未足以為利民也。

近者伍廷芳博士著民國圖治芻議。其十一十二兩章論司法。謂宜先行憲綱七條。『(一)凡國人不論何事。若無合格衙門所發之票。不能擅入鋪屋等處。捕人與搜查。及封禁房屋鋪戶等等。』(二)在街道中。如無合格衙門發出拘人票。或其人安分現未目睹。其在街上犯法。不准拘拿。』(三)所捕之人。必須於二

十四點鐘內提案由法庭當衆審訊(四)如一人犯事只可將本人科罪於本人父母妻子及親戚夥伴均不得牽連又凡審訊刑事民事各案均不準用刑(五)或照例將犯罪人財產充公只准充本犯人名下財產別人所有不得牽及(六)如犯以上數條不論爲官爲商凡受害人得以起訴要其賠補科罰(七)審判官所斷之案件行政官不能過問如有冤抑得上控於合格衙門」此七條者爲保障人權之根本法自千七百八十九年八月二十六日法國議會發布「人權宣言」以來各文明國憲法無不以此等類似之規定特立專條垂爲憲典博士謂中國今日亟宜頒行記者極表同情惟記者之意中國司法之黑暗迥異恆常其違背法律侵害人權隨事隨時觸處皆是僅此七條必不足用茲就記者見聞所及陳其大略並擬補救之法於次

第一 訴狀 往日習慣訴詞由代書鈔寫依遞狀者之家資定寫狀費之多寡狀中言語倫與官有利卽不代寫逢三、八日收狀非收狀之日而遞狀者須納特別費約數十元或百元不等當事人遞狀後手中無絲毫憑據故訴訟人之狀詞官得隨意銷毀今擬關於訴狀之規定分五條(一)代書寫狀費之多寡以章程訂明收費後按數填發收條嚴禁額外需索(二)每日收狀嚴禁三、八放告之習(三)收狀後填發收條以免擅毀狀詞之弊(四)遞狀人願自繕寫者聽以免代書因狀中語言致有留難之弊(五)除狀紙費及寫狀費外不得因收狀而收費無論何項名目悉宜革除

(未完)

外論

與張純一言神道

劉通

陽歷三月二十五日教悉前由舍下逕寄兩函不審都已收訖未也所言「以佛法溝通耶穌神道而昌明之」者正僕之日夜所祈嚮者也原夫道一而已矣往聖諄諄因其承當之文史涉世久暫不同則語言文字因緣或有繁簡精粗之差別耶穌之教自保羅去後雖有待而爲之恢曠然會觀保羅十四書大義證以散見於四福音中耶穌之教行則耶穌之教可以通於真宗之佛說確乎無可疑矣佛法流傳此土開宗立論已大昌明則所謂以佛法溝通耶穌神道而昌明之者乃文史之賜因其勢而利導之耳我無功勞足下意識中主因比論耶佛一段則多誤解佛說多從體顯用故貴由解起信由信證入自性成佛一語明體也亦即學佛者信仰之大根柢也第經論名言往往不一自性或曰真心或曰心單或曰圓覺起信論中直修真如三昧者爲悟於自性最簡捷之方便法門未悟以前直須重死重生生死路上難於信仰自性成佛之訓即信矣亦不過懸信佛語非自見解既重生矣始知衆生本來成佛生死涅槃猶如昨夢經曰如華嚴夢渡大河喻等上帝即真神真神即是聖靈故經約新中言神言重生言永生言天國等其立足處皆基本於一個聖靈不名一言或而篤實輝光之聖靈本無去無來無隱無現因人心迷悟之作用似有去來隱現則生滅門中法耳聖靈之無去來隱現者即衆生本來是佛菩提之法非可修相非可作相

畢竟無得起信然耶教多從工夫效驗處立言而略於體也蓋耶穌降世之遭逢文史不及於五天竺國又復匆匆三載譬喻曲引故身雖殉道而以不盡欲言爲憾此耶穌之教自保羅去後所當汲汲者根本教義之光穡精進耳門戶之嫌生死路上比擬之諍非所急也神校事我已却謝熊升恆兩三年前曾與爲莫逆交近則晤時極少而音書亦復疎絕其他故舊亦格格遠離悠悠天地塊然離索吁

五月七日後日人之言

莫安仁 太冲

中日交涉解決後日本報紙關於此事之論文極多茲就東京「日本日報」擇譯數條於次

(一)商人對於中日協約之觀念 中日交涉和平解決日商在華之營業譬若風雲黑暗之後又見青天朗日內外商人同聲慶賀當交涉未定時華商停止購買日貨近接上海來電謂此種風潮已成過去事實從五月八日起華商向日本訂貨者甚多(譯者曰此言確否敢問愛國華商)揚子江一帶華商聞交涉之平定其欣喜之心視吾日人爲尤甚(譯者曰愛國華商聽者)揚子江一帶華商致電上海向日商訂貨者爭先恐後(譯者曰愛國華商聽者)吾日人此後在華之商業必日發達觀此益可證明茲將邇日商界鉅子之言論略述於後

貴族 Shibusawa 氏之言曰此次交涉和平解決深足爲日本國家及商人慶賀當交涉未定時若有非戰不可之勢幸因交涉得人且中國承認日本和平主義深知日本未有惡意(譯者曰愛國華人聽者)

乃令絕大風波。平穩渡過。現兩國和平訂約。聯絡感情。從此商業前途益形發達。可預爲決言矣。

中日實業公司總理 Kimachi 氏之言曰。此次交涉和平訂約。深可慶賀。前者日商在華之營業。漸呈拮据之狀。因商業興盛。須以兩國和平爲前提也。近日大局平定。日商得此良好之機會。譯者曰。此良好機會。華商亦有之否。可使在華經濟較前益形發達。敢勸在華日商乘時經營。勿誤此良好機會也。

上海日商大倉氏之言曰。予在華辦事數年。今聞交涉和平解決。實深忻喜。聞日人中有因讓去數條。不以爲然者。予敢信商人之中。必無不以此條約爲然之人。今所議訂之約。按照第一次條件。雖有讓步。然於吾人之事業。固已無所不便矣。譯者曰。愛國之華人聽者。自保全遠東永遠之太平言之。自以第一次之條件爲最善。但此事不必過慮。且夕仍有機會。足使吾人達第一次條件之目的。譯者曰。且夕再有之機會。爲何等機會。耶。愛國華人知之否。與。現吾商人惟有乘此機會。竭力經營。以圖成功也。可。紗商 Wada 氏之言曰。兩國如此訂約。不獨足爲兩國慶幸。且足爲人類幸福慶幸。兩國若不幸失和。則愈令世界人類不安。就吾人之紗業言之。平日出紗甚多。若果失和。則必不能交易。日本往日恆令供給過於需要。自歐戰發生。需要轉多於供給。譯者曰。愛國之華商聽者。是實助商業之發達。最好機會。若失和開戰。則必將此最好之希望消滅。今幸和平解決。其有利於營業前途。甚非淺尠也。

二二日日新聞之言論。政府與商家現應竭力提倡在華之商業。使之日益發達。自歐戰發生。華人購

買貨物之力日漸減少。推厥原因大半由於歐人不借外債無錢購買之故。吾日人當此時機應亟投資本運手腕以圖在華營業之發達。（譯者曰愛國之華商聽者）中國天然物產甚多若能擴充營業則華人之力必益發達。吾日人務宜注意日人果應如何乃足使在華營業較前進步。吾日人現應負責任使兩國之通商事業益臻鞏固也。

（三）東京朝日新聞之言論 邇者政府辦理對華之交涉未得十分成功皆元老院諸人從中作梗之咎也。此項交涉本不易辦自有元老阻其進行辦理乃益棘手。記者深願政府告知元老此後交涉事件不再與之商量庶免異日再有失敗耳。

（四）日本日報記者自會議旁聽席歸後之言論 近日輿論之趨向彷彿將交涉之未得十分成功歸咎於元老院。元老反對致哀的美敦書之舉主張於未發哀的美敦之先由加藤親往中國與中政府直接談判。第一次元老與政府會議時間極短加藤當日意欲辭職政府不許政府預備全體辭職。嗣經一人與元老接洽雙方讓步政府將條件改輕元老乃允將哀的美敦書發出。現有人謂當時政府初未將第五號通知英國。（譯者曰日政府對同盟國之行爲日人固已自白矣）嗣將第五號大略通知英政府。回文說明英見第五號條件有不願贊成之意元老見英回文乃益反對政府。（譯者曰此等情形不知中國外交總次長及駐日公使當日知之否）而政府乃將第五號取消。（譯者曰據此則後日中國

於第五號允日後再議不獨出乎日本元老意料之外且亦非日政府所計及者矣。現今在野黨反對大隈內閣所預備之反對問題雖非一事而以中日交涉爲最重大日後國會開會必有一場辨論大隈近見衆議院中政府黨居多數甚形得意惟貴族院中某某派謂政府行事違背憲法有反對大隈之意是以內閣羣有戒心總之日本政界現正爲多事之秋耳。

(五)日本日報記者追論昔日所謂「奇異之謠言」加藤氏在外交界向負重望中日交涉起有一種奇異之謠言頗足損害加藤氏之名譽謠言謂「日本未將要求中國之第五號通知英政府」其說與日本之計策極有妨礙一月前有人言英國駐日大使深怒加藤氏之失信其時不信謠言者尙多至於今日乃證明謠言之非虛矣第五號中第五項所言之鐵路權早歸英人加藤應久知之乃其行爲竟至如此不亦極足詫異耶正月十八日倫敦某大報訪事至東京訪問加藤得見日本要求之條件訪事歸寓即將該條件電告倫敦報館該報住居北京之訪事同日亦以探得之日本條件發電報告該報館主筆一時見兩電內容大相逕庭由東京來者極其和平由北京來者極其嚴酷羣以由東京來者較爲足信乃將其稿載諸報中並著論謂日本對於中國之要求並無不合洎後日本隱匿之第五號漸漸顯露由北京電告者毫無虛偽該報館乃深爲抱憾因其論文受日人之愚弄也吾人今觀此事竊謂加藤此舉不獨足損個人夙昔之名譽且與日本國家亦有不利爲今之計日政府亟應將從前欺騙人之行

爲按實說明以釋他邦之疑庶足收補過桑榆之效耳。

狹義愛國與廣義愛國（譯英國戈耳氏演說稿之一）

莫安仁

愛國之義有二。一曰狹義愛國。二曰廣義愛國。狹義愛國專愛本國。一國者是廣義愛國。兼愛本國外國者是狹義愛國。盛行於世。世界愈難。太平廣義愛國。不然。知廣義愛國者愈多。則世界愈臻文明大同之域。主張狹義愛國者。必反對廣義愛國。而主張廣義愛國者。必無礙於狹義愛國。二者之異。同出入關係世界。綦巨。自來人類。祇知有己。不知有人。極與正義不合。人生於世。彼此不相扶助。與人無益。卽與自己無益。扶助他人。表面利人。實卽所以自利也。所謂他人。不祇指同國同種者言之。異國異種之人。悉含於內。英國今者。不能不助法國。卽所以圖英勝利也。日本欲圖利益。不可祇知有己。必無害於中國。日本自己後日。乃能有利。一國之人。祇圖利己。不顧他人。他人受害。自己害亦隨之。古來蹈此弊者。類無良好之結果。今者此弊。傳於歐洲各國。祇求自強。築礮台。造兵艦。整軍講武。以謀勝人。吾人默觀世事。竊以此種主義。不久必將廢棄。推狹義愛國之心。以成廣義愛國。則世界之太平。庶幾有望耳。英國學者戈耳 Bishop Gore 氏爲教會監督。近在某地教堂演說狹義愛國與廣義愛國之利害得失。問英人於二義中。豫備採何主義。文極精切。足爲救世良藥。茲擇譯之。以供衆覽。文曰。

嗟吾同胞。今茲巨戰之後。必籌良策。創造新歐洲。然吾同胞將以何主義爲創造之基本乎。

凡大軍之後必生許多事業助長社會之進化此考諸歷史屢見不一見者也英國然歐洲然推之世界莫不皆然嗟吾同胞與吾教士應速警醒悔悟同心協力豫備創造歐洲之新世業上帝神靈爲歐洲豫備者已久其事維何即使天國立於世界是也吾人今日其體上帝之心以行事抑舍上帝而自行己意斯爲今日重要之問題亟宜速爲籌畫嗟吾同胞勿謂現值戰時無暇計及此事今之禦敵城下作戰海上以及躬親戰事之人謂爲無暇或非偶然吾人則不能若是也吾人今應就斯問題共同研究勿謂有此戰事愛國之心已盡吾人應亟竭其心想以求長治久安之計嗟吾同胞彼以一次戰勝爲盡愛國之責者實狹之又狹之義也吾愛國之同胞幸擴充範圍而圖其廣者焉

往古聖賢類主廣義愛國試觀舊約之中諸賢教訓因擴張愛之範圍致遭庸俗之訾議基督立教主張博愛愛之範圍亦與庸俗不同吾人應知廣義愛國愛之廣博皆由親近上帝吾人若思爲上帝之友則中懷觀念自異平常嗟吾同胞其有願明廣義愛國者應速醒悟惟知醒悟乃能明上帝之教訓也

論者或疑主張廣義愛國必致不愛自己之國是不然廣義愛國與保全己國各不相妨英法俄現竭力反對德奧以廣義愛國言固亦正當之舉也蒙上帝之恩澤使德敗績今日廝身陸軍海軍飛艇及各項軍務之人各盡其力以全職分均屬正當之事時至今日舍此更無別項職分可言也此種主義非獨基督教爲然世界各教均有此說無論其人已未受基督教訓莫不同有此心吾人今日見夫陸海軍人忠

義。勇。敢。犧。牲。己。身。以。保。國。家。誠。不。勝。欽。感。羨。慕。之。心。各。人。平。日。不。必。同。有。特。別。德。行。自。今。觀。之。其。實。行。基。督。之。說。已。達。極。點。基。督。之。言。曰。『。人。爲。友。而。舍。命。愛。無。大。於。此。者。』。驗。之。各。人。之。行。事。其。愛。之。大。爲。何。如。各。人。平。日。非。無。一。二。失。德。之。舉。至。於。今。日。效。命。疆。場。吾。人。敢。信。其。忠。義。之。身。必。仍。爲。基。督。所。寵。任。舍。俗。世。而。升。天。國。洗。舊。染。之。污。成。清。淨。之。體。與。上。帝。日。相。親。近。各。人。幸。福。固。非。庸。俗。所。能。企。其。萬。一。矣。

吾。人。家。居。未。獲。躬。親。軍。役。然。吾。人。愛。國。之。天。職。固。依。然。存。在。也。吾。人。應。盡。之。天。職。非。特。慷。慨。輸。財。振。濟。急。難。尤。有。重。要。義。務。不。可。忽。畧。其。事。維。何。卽。正。當。之。廣。義。愛。國。是。也。無。論。政。界。學。界。商。工。家。宗。教。家。均。應。盡。斯。義。務。現。今。國。家。日。及。危。迫。彼。祇。知。狹。義。愛。國。者。實。不。明。時。勢。者。也。嗟。吾。同。胞。眞。心。愛。國。應。以。往。昔。先。知。之。言。爲。圭。臬。試。考。以。賽。亞。書。等。凡。鞏。固。國。家。誠。心。愛。國。者。皆。舍。狹。義。而。取。廣。義。其。說。雖。舊。然。施。之。今。日。歐。洲。實。可。稱。救。時。良。藥。兵。凶。戰。危。雖。反。上。天。好。生。之。德。然。天。父。能。乘。此。事。成。其。意。旨。天。父。今。倚。信。道。之。士。助。其。行。事。無。論。本。國。外。國。凡。受。感。化。者。皆。應。竭。誠。禱。告。求。上。帝。之。引。導。發。達。天。國。惟。有。禱。告。感。力。爲。最。宏。大。也。

嗟。吾。同。胞。應。亟。省。悟。天。父。欲。用。人。成。其。意。旨。吾。人。若。不。順。從。天。父。之。意。則。天。父。如。何。用。之。吾。人。反。躬。自。省。若。有。私。心。不。務。清。潔。則。吾。人。如。何。行。禱。告。之。禮。吾。人。亦。知。誠。信。行。善。世。間。不。一。其。人。然。統。全。國。計。之。未。知。其。皆。能。恪。遵。教。旨。否。吾。人。良。用。憂。懼。嗟。吾。同。胞。一。國。之。人。不。皆。依。從。教。訓。則。受。天。父。之。恩。澤。者。必。少。凡。愛。

國者。可不省悟。勉力求之耶。

歐洲半年中之戰事

閩侯邵筱翊譯

光明磊落法人之回觀 退兵紀事 端賴乎最後之勝仗

路透電由法國最有力官場中得歐洲西徧戰場中自開戰至今年一月之戰事報告。雖其中篇幅頗長。且不乏軍事學專名詞。然閱之者亦頗饒趣味。

霞飛將軍之佈置已經表示。且亦解釋其戰略因何未能實行。故不得不隨時更變。篇末載有戰事滿意之結果。與最後之勝仗。

亞爾薩斯之戰 戰事開始之第一月頗稱順利。末以法軍戰敗。而時局爲之一變。吾人集兵之計劃。已預知戰事有兩大行動。左在伏斯巨與摩塞爾之間。右在文耳同至吐爾線之北。此兩處行動實有大影響於我運兵之事。八月二日因德軍通過比利時。故霞飛將軍不得不改變其集兵計劃。致能注全力於北方。

北方戰事須待時而動。故於籌備時須使最多數之德兵留滯於亞爾薩斯。我軍總司令命本師進據摩耳福斯折斷萊因河之紅寧以下各橋樑。後往攻羅蓮。此戰因領兵者不善奉行。立改命令。致本師到摩爾福斯後爲敵所窘。退至比福德。在多耳納克大戰後。於十九日下摩爾福斯。得敵之大礮念四尊。廿日

我軍據有自平原至克耳馬并自伏斯巨至克耳馬之濠壘。敵軍損失甚巨。子彈與軍械亦損失不少。惜因斯時所遇於羅蓮者牽制本師戰事未能進行。以我軍之在亞爾薩斯者尙須他往。八月廿八日亞爾薩斯兵潰散。而留駐他安與伏斯巨者爲數亦無多。

戰羅蓮兩軍均勢。亞爾薩斯開戰之宗旨。係欲阻滯多數敵軍。使不得與北方戰場接近。八月十四日我軍開始取攻勢。十九日進至沙耳堡與愛湯斯湖地。據有打燒子摩耳打帝耳與查桃諸邑。我軍之進步於廿日中止。其原因爲此地敵軍礮隊組織甚爲完固。且戰地曾經其詳細測量。我軍自處於弱敗之勢。

廿二日我軍不但不能進取。而南時各軍竟亦失利退至大克蘭。廿三日德於倫埃維里集聚援軍強驅我軍南退。德軍兵力極少有三師團。廿五日我軍兩路悉力拒戰。一由南而北。一自西徂東。敵軍敗退。自此戰勢雙方兩得其均。相據十有五日。後我軍轉佔優勢。

北戰開幕。北方戰事之所以遲延。係因決待英軍故也。及我軍集兵事竣。總司令命我中軍與左翼兩軍力取攻勢。中軍兵力係兩軍團組成。而左翼則爲兩師團。馬兵一大隊。後備兵數小隊。英兵一軍團。比兵一軍團。此皆曾於前三星期與前敵在里愛巨并南蒙耳羅文等處接戰。

德軍斯時之計劃。係以步兵七八師團。馬兵四小隊。沖過極委德與不魯式爾斯之間。而我軍之目的係

欲先犯其中軍。次攻其左翼。然後長驅而北。八月廿一日我軍以十師團攻敵中軍。八月廿二日我軍失利。其原因甚爲複雜。勿庸贅述。

我軍佯退以驕敵。設我中軍左翼及英軍能堅持到底。照計而行。尙能轉敗爲勝。乃事有大謬不然者。我師敗績。敵軍渡過商卜耳江。我左翼退至婆門德極。委德因各軍士均信德軍此時正在擾我右翼。故軍心慌亂。同時英軍亦敗退。致敵軍渡過描斯江。建造礮臺。增速其右翼之行動。

現時戰局略言之可行者共有兩事。非力扼邊界。卽設計佯退。然力守勢極危險。而佯退不過暫時棄去土地。兵士尙可無恙。時至猶能反取攻勢。二者取一。總司令贊成實行第二計。法軍從此遂籌備反攻。卽時決定實行三事如下。一實行退兵各軍須半禦半退使敵常勞。一退兵須定至某點爲止度各軍退至此點卽時共同反取攻勢。一未至退兵止度之時遇有反攻之機當視合於我軍同英軍之利用否。然後合取攻勢。

禦敵之順利。退時禦敵之戰。極爲順利。八月廿九日我軍戰克聖廣町。以解英軍之困。尙有大兵兩師團并後備兵數小隊與普魯士衛兵并德之第十師團戰。該團初從該斯山峪來也。日將晡敵敗退奧伊斯。使英軍前敵一廓清焉。八月廿七日我軍敗敵於描斯。以其欲佔左岸故也。

在麻爾飛與裔耳汨兩處。至廿八日止。我軍均獲勝利。蓋我軍奉總司令命令於卜支卜線擊敗敵軍。廿

四日聯軍又於阿騰與斯邦各得等處得勝利。廿六日各隊再渡描斯江。復與中軍接合行動。我軍全軍無損。趁之重取攻勢。

廿六日又以大兵兩師團後備隊五小隊摩洛哥兵一聯隊組成一新軍。此軍於八月廿七日與九月一日之間集於阿門斯。與英軍會於漢卜斯線攻德軍右翼。

德軍進兵之迅速。因德軍右翼進行之迅速。致我軍所望得再取攻勢又成空想。其行軍迅速之原因有二。一因我時不及將新軍全數運往。二因我之左翼於八月卅一日受敵太深。知此二者即可以明敵於九月二日晚進兵迅速之形勢也。

敵軍馬兵一大隊已經渡過奧伊斯。進至查挑提耳利。第一軍軍長為克拉克將軍。統率精兵四師團。後備兵一大隊。進至抗押。第二軍軍長布蘆將軍。統帶精兵三師團。後備兵三大隊。前往哀央地。第三軍軍長何森將軍。統領精兵兩師團。後備兵一大隊。進至哀斯汨。再而東之。其第四第五第六第七各軍。即精兵十二師團。後備兵四大隊。并二沙子各小隊。與我兵接仗。其四五兩軍在抱支耳斯與文耳同之間。其餘各軍均在文耳同與伏斯巨中也。

退兵之極界。若我軍肯與敵戰。我左翼當能制勝。惟萬一一敗。則前途不堪設想矣。至我軍與巴黎及英軍聲氣之相通及敗時自不待言。即我所組之新軍亦難與之聯絡。故此時必以慎重出之。萬不可輕

於一擲。失負我露西亞將來援助之苦心。是以霞飛將軍遂決暫緩回攻。繼續後退。待時而作也。嗣將軍於九月一日定退兵最後之界限。我軍退至卜斯盛納斯盛亞斯亞直至巴獨之北。

中立國可否售賣軍用物品於交戰國乎 (續)

莫仁安 王子溥

崇尚和平之國。非懶也。非怯也。尊民命。重民生。平時庶政。若養若教。一以保民權利。增人幸福。爲主國用。大宗首在民政。而不在軍政。此崇尚和平所以爲世尊重也。若訂條例。禁止戰時買物。則平時養民諸策。至斯悉成。泡影。國富而不能自守。民衆而不能安居。平日之蓄積經營。適爲強國垂涎之導線。而推其原。因皆禁買中立國物品之例。有以致之。此禁止售賣無益人類者。又一。

千九百零七年海牙和平會議。中國代表。『問甲乙兩國甲欲開戰。乙不願意。事將如何。』一時對此問題。幾無適當之回答。西諺云。『開戰必須兩國。』又云。『羊遇狼。羊不抗。狼必食。羊』彼禁止售買軍用品於交戰國者。一助狼而不救羊之類也。

今之慣例。兩國戰爭。倏爾而起。譬若失火。非人意料所能預計。其平時無事先有預備者。遇此最稱便利。否則。未有不陷於危險地位者。試觀俄日戰爭。俄向以日不致開戰。而日已毀俄之軍艦。戰事之迅速。從可知矣。於此。倘猶禁止中立國賣軍用品。勢必使保守者預備於平日。昔日願守而不願攻。今將預備作戰。藉攻以代守。由守國而使之成爲攻國。是則禁賣之例。始之助狼害羊。終且迫羊變狼。舉世增加好戰。

之危險。謀人類之幸福。初意固如是乎。烏乎擾亂世界之和平。阻止文明之進步。將皆以此禁賣之例爲厲階。可勝慨哉。

大抵中立國之通商與世界之和平極有關係。其中恆有不願外國戰爭之意。含蓄於內。譬有甲乙兩國。甲國注重軍事。築礮臺。修船塢。造飛艇。製快礮。練兵講武。日不暇給。乙國不尙武勇。或重農事。或尙商業。致心力於田野。積寶物於市廛。堅甲利兵。素鈔預備於此。兩國不幸而有戰事。甲國獲勝。乃事之當然者也。乙國雖富。然必能由他國買軍用品。濟其不足。乃足保其疆土。而無敗弱之虞。否則爲甲國所征服也。必矣。議者倡此問題。欲訂一法。改變舊例。是實保好戰之國。而害和平之國。於人類果有何益乎。僕敢斷言曰。禁止中立國之通商。有百害而無一利也。

今之戰爭。倏爾而起。按海牙平和會議。決條例。兩國開戰。須先宣告。但宣戰之時。距開戰之時。不須多時。雖於宣戰意思發表後。即時實行交戰。亦無不可。海牙平和會列席者。四十二國。雖有十四國於此條例未嘗簽押。然國際之慣例。固屢見不一見矣。茲述數則。(一)千八百七十年某日。英外務大臣格蘭維爾氏 Granville 與次長某閒話。謂現今歐洲除希臘土匪搶一英人外。幾無他事。未二小時。乃傳一重大新聞。西班牙王位爲普魯士人所得。八日之內。法蘭西與德意志已開戰矣。(二)俄日戰爭。日以陰險手段。用小船毀俄巨艦。其時尚未宣戰也。(三)千九百十一年。意土因非洲而起交涉。九月二十五日。甫提

議。越。四。日。已。實。行。交。戰。至。於。今。茲。歐。戰。陣。線。之。廣。幾。及。全。歐。影。響。所。及。尤。關。世。界。開。戰。之。始。忽。焉。發。生。當。時。變。故。猝。至。有。欲。他。適。而。未。得。者。有。幸。得。逃。出。而。行。李。器。物。均。不。及。攜。帶。者。船。埠。車。站。來。者。爭。先。恐。後。以。冀。得。行。是。亦。可。知。事。變。發。生。出。人。意。料。矣。

英。儒。李。克。Lecky。昔。著。書。論。『。歐。洲。文。明。道。德。之。進。步。』。中。有。言。戰。事。者。謂。按。之。今。人。觀。念。國。家。強。盛。不。在。糾。糾。武。夫。軀。體。強。壯。乃。在。財。產。豐。富。生。計。發。達。世。界。之。中。惟。富。國。爲。能。主。張。和。平。財。力。愈。富。愈。可。養。其。和。平。之。心。而。漸。達。弭。兵。之。希。望。現。今。歐。洲。和。平。主。義。人。益。信。從。因。歐。洲。日。富。故。也。若。依。議。員。提。議。使。人。各。懷。憂。懼。先。自。預。備。則。必。盡。棄。和。平。主。義。而。養。其。好。戰。之。心。不。亦。與。李。氏。之。言。大。相。逕。庭。耶。

當。百。年。前。戰。期。長。久。有。延。至。三。十。年。者。今。則。不。然。今。之。戰。事。忽。焉。而。起。亦。將。忽。焉。而。滅。譬。若。暴。風。雖。極。激。烈。不。能。歷。幾。許。時。也。現。今。陸。地。有。戰。大。洋。有。戰。上。自。空。際。下。至。海。底。罔。不。有。戰。器。具。精。利。財。用。宏。多。一。礮。之。發。需。銀。數。千。一。戰。之。後。傷。人。萬。計。比。國。按。土。維。爾。那。慕。爾。等。礮。臺。向。時。攻。之。一。年。未。能。必。破。今。則。兩。三。日。已。陷。之。今。之。攻。者。因。利。乘。便。恃。強。前。進。守。者。尤。憑。堅。執。銳。勇。蓋。一。世。槍。林。礮。雨。之。中。壯。者。居。之。不。數。日。而。神。經。震。動。爲。之。損。傷。故。雖。智。謀。出。衆。貨。財。山。積。而。因。傷。人。耗。財。之。迥。異。恆。常。亦。不。能。久。戰。不。止。是。則。今。日。戰。事。之。大。勢。也。

夫。戰。事。至。今。酷。烈。若。是。凡。爲。人。類。謀。幸。福。者。安。可。不。計。利。害。偏。於。好。戰。之。國。僕。意。世。界。各。國。應。共。設。法。消。

滅。此。事。庶。於。人。類。前。途。免。許。多。之。危。險。議。員。提。議。助。強。國。之。戰。爭。僕。竊。期。期。以。爲。不。可。法。官。審。案。保。護。被。告。爲。其。弱。也。今。於。國。際。亦。必。輔。助。和。平。而。不。好。戰。之。國。乃。爲。公。正。明。達。救。斯。民。於。水。火。耳。

僕。敢。忠。告。美。政。府。應。速。宣。布。方。針。謂。不。改。往。日。之。條。規。一。依。國。際。歷。年。相。沿。之。成。例。爲。率。由。之。標。準。蓋。美。政。府。表。明。此。意。則。凡。交。戰。國。知。美。遵。守。舊。法。一。切。交。涉。當。即。據。舊。法。以。理。直。而。免。無。益。之。爭。議。矣。

按。照。舊。法。中。立。國。得。與。交。戰。國。通。商。或。食。物。或。軍。械。或。牛。馬。交。戰。國。向。中。立。國。買。入。既。無。背。於。公。法。中。立。國。對。交。戰。國。賣。出。亦。不。害。其。中。立。兩。國。在。海。上。買。賣。縱。經。敵。人。查。出。捕。獲。亦。與。中。立。國。之。政。府。無。絲。毫。之。關。係。中。立。國。商。人。與。交。戰。國。訂。立。契。約。倘。於。普。通。法。律。無。所。違。背。則。按。公。法。此。項。契。約。應。爲。有。效。而。無。危。險。因。此。契。約。發。生。訴。訟。一。依。普。通。法。律。判。斷。無。特。別。之。規。定。往。日。法。例。如。是。英。國。成。案。類。此。者。亦。多。

美。國。法。官。施。套。賴。氏。有。時。在。法。庭。宣。言。無。論。美。國。法。律。外。國。法。律。無。一。禁。止。美。人。與。外。國。人。通。商。者。商。人。買。賣。縱。有。失。敗。俱。屬。個。人。行。爲。與。政。府。無。涉。千。九。百。零。五。年。英。法。院。於。俄。日。戰。爭。時。判。決。一。案。亦。與。此。同。是。故。按。諸。國。際。成。例。及。本。國。外。國。例。案。皆。與。維。持。和。平。之。主。義。相。合。今。美。政。府。率。循。舊。法。而。不。停。止。中。立。國。與。交。戰。國。之。通。商。乃。有。益。人。類。適。法。而。合。理。之。舉。也。

歐戰後之俄羅斯

美國喬治克南著 公哲譯

(一) 改革問題

試審察俄國內閣大臣之宣言議院之言詞報紙之論調軍人之氣質俄國內部現固甚爲和洽前日內政上意見紛歧之處今以戰事之關係蓋已悉底於平願戰爭必有終結之時期設戰事完結俄國及其同盟國獲有勝利未來之現象當何如歟戰事後俄國之情狀其與歐洲各國關係之重要直與俄國對於現時戰事之態度等吾儕於未來之時期將見一革新之俄羅斯歟守舊之俄羅斯歟抑革命家與中古式政府競爭之俄羅斯歟欲解決斯問題當注意三點（一）俄國所須要之改革（二）俄皇及其侍從對於改革之狀態（三）改革之機會

從歷史上徵之俄國每當大戰之後國內必有革新或革命之事克里米戰後釋放農僕改良司法俄法戰後革黨暴動俄土戰後亞歷山大第二被刺俄日戰後革軍騷動改良或革命之事恆與戰事相隨俄羅斯國民今固以戰事爲重合力禦德但至戰事完畢之時其集合亦必破壞國民因戰事所蒙鉅大之損失必向政府要求內政改革爲之抵償無疑義也

少數國民未嘗不願推翻帝室建立民國均分農田然就現時俄民之知識經歷言此根本改革尙覺難於實行俄國現所最應革新者卽自由權與人權保障二者是已余於俄民所願望革新之事殊不欲縷述然有一最重要而其實行并不影響於政府體制者卽實行平時法律以代軍法是也俄國之大部分受軍法之治已及十年就各大城鎮并俄京而言自一八八一年來迄今未嘗解嚴此等事實美人聞之

誠足驚駭。凡其戒嚴之地。平時法律均停止效力。人民常受軍法之治理。其人權將何自而保全耶。

各省長官依軍法皆有任意發布使人民負責任法則之權。凡有違其法則者。或處罰金。或處禁錮。故此項法則實際上。不啻法律。其與法律相異之點。僅在立法者意見之衆寡耳。因各省長官可以發布法則之結果。國內政令遂致淆亂。此省所許者。或爲彼省之所禁。同一事情。或則認許。或則科罰。全視作者所居之省分而定。有俄京某報。因撰一論文。而致盛譽。克斯克省某報轉載之。竟受三月之禁錮。莫斯科檢稿官認明某書無礙治安。而阿長格省長官竟因查出其書之故而將公衆之藏書室封閉。如此之類。不勝枚舉。政令紛歧。可勝浩歎。俄民雖悉遵守法令。亦不能無虞。苟於省立法則偶一怠忽。官員卽可以行政處分。放之出省。所謂行政處分者。乃軍法之所認許。卽凡法令所未備者。省長官得以獨裁行之。是也。噫。此適用軍律之獨夫政治。非特阻抑民氣。亦適足以激怒國民也。

職是之故。俄國現時必要之改革。首在廢除軍法限制官吏專斷之權。賦與民權。法廷非依平時法律。不得捕拿平民。或加以損害。得斯革新。俄民庶幾得有半數之滿足。惟是限制俄國官吏之權。卽所以限制俄帝之權。彼軍法者。乃俄帝所頒行官吏之淫威。乃俄帝所賦與斯固事之無可疑者。故俄國之安寧。非至俄帝自願受憲法限制之日。不得而期。俄帝於大戰之後。誠得有機會裁制專制大權。重行平時法律。規定官吏責任。惟彼及其侍從。果承認此近世民權之精神與否。實爲未決之問題。而在俄民一方面對

於戰事固極願爲國犧牲而於限制君權實行平時法律限制官吏主教地主選舉上之優先權增大議院之立法權普及國民教育制作公共會社及報紙之法則諸內政之改革則希望之心極其深切也。

(二) 現時與未來之政策

就俄政府現時對於改革之狀態以預測其未來之政策則改革之事殊爲無望當開戰之六月後俄國經濟家白希高努曾言未來之俄國政府必仍率由舊章不事改革今距其宣言之時又及六月俄政府之頑固守舊益徵確實新聞記者謂戰勝俄民所可希望之自由將爲歷史上所習見之自由政府心理上之自由詳言之卽俄帝之幸福臣民昔時所常享受之自由其言誠非無所據而言也。

俄政府之守舊就封禁自由經濟會社一事最足徵明自由經濟會社成立於嘉塞倫第二王朝迄今已百五十年俄國最先成立之科學會社也其設立宗旨原在討論經濟問題以熱心公益之故於救濟事業遂亦竭力經營救災賑濟成績素著至戰事發生以後於戰時救濟事業尤能力爲推行洵足補充紅十字會能力之所不逮因欲慰藉傷兵破其沈寂乃於各醫院中創設書室其書籍自徵集而來適合普通程度原無政治意味亦未藏有禁書克斯克省長官摩拉脫將軍對於國民閱書本非所願而於軍士閱書之事尤所痛嫉因特至自由經濟會社之病院書室徧爲搜索覓得關於政治之書冊四五種卽宣判自由經濟會社意圖毀敗軍士道德其書室著卽充公假令此事發生開明專制之大彼得尼古拉司

第一。王朝彼二帝者未必不申斥該省長官之越俎。蓋檢閱書籍固屬於檢稿官之職務也。惟尼古拉司第二確非其人。彼對於摩拉脫此舉深表同情。各省長官逢迎帝意於是各處之病院書室乃全封閉。并發布法令。凡發行或收受自由經濟會社之書籍者處三千盧比之罰金。或三月之禁錮。此固自由經濟會社之厄運矣。而俄皇及其侍從之心猶未滿足。更思懲一儆百之計。以立未來之防維。二月十三日。乃宣告在軍法實行期內。即戰事期間。封禁自由經濟會社之命令。噫。誰謂此不足表明俄政府之頑固守舊耶。

俄國經濟學者多主改進。因之自由經濟會社政見亦主改進。然其對於戰事之忠義愛國固無可評論。其會長已爲德之俘虜。書記員及賑濟股長皆以義勇兵而戰死。其他會員亦多效力前敵。彼摩拉脫者身被將軍之號。固未嘗效力疆場。今以壓制自由經濟會社之功。竟蒙俄皇優擢。而經濟會社賑濟股長忠骸歸葬。時政府以其曾妨害秩序。檢稿官將各項輓詞廢除。及半此非俄帝專制守舊之明徵歟。其他如對於革黨激於公義歸國效力者。議院議員之論定戰事之未來者。捕拿遣戍。此等專制之舉動多不勝書。昔日學者每謂俄之專制乃受德之影響。今俄德邦交已破。而俄政府之專制乃愈加甚。然則俄政府固自有其專制思想耳。吾恐其不受強力所迫革新之事。殊不可期也。

(未完)

評論

世道陵夷。於茲已極。狂瀾難挽。孰與盡性弘道。主持風教哉。近得熊友升恆。雖未識面。然已神交於二千里外有日矣。及讀其答諸友書。識多獨到。甚獲我心。嗚呼。自生民以來。不甘從政之陋。而務爲萬世大造厥命。莊嚴無盡樂土者。未有如釋迦耶穌也。願共勉之。用質當世之明達。張純一附識。

熊升恆覆何君

頃奉手教。循誦再三。感愧交集。今之議者。必謂升恆溺志田園。顧區區所懷。實難強人共喻。夫奔走以弋富貴。憤嫉而求一逞者。我知之矣。而皆不樂也。卽心誠救世。而與其爲諸葛之馳驅於蜀。盍若爲幼安之講學於山。古今眞人品眞事功。固未易爲俗人言也。辱承相知。故略道所以。企一證定焉。

熊升恆答吳貫因

柳隅仁兄足下。無恙。方今時事言之傷心。大難削平以來。舉國浮囂之氣。一變而成泄沓之風。當道以叢脞爲簡。以凝滯不動爲無爲。姦佞並進。貨賂公行。士有倖心。民無固志。以此見世亂未有已也。自古聖智所以經世宰物。一本於大經之正。經正則庶民興。庶民興斯無邪慝矣。故嘗歷觀國家亂亡之際。必有一二獨秉天心之大人。或飛或潛。以爲萬物儀表。此主造化而不役於化者也。至於因時矯弊。斯其次矣。矯弊稍過。弊卽生焉。孔老同傷。周末文勝。老氏一意返之樸。孔子則曰文質彬彬而已。孔子所以爲時中也。

羣情波靡。偏流則易。昔歲之事。可爲殷鑒。足下譏時人復古。升恆恐所復者非古耳。卽如司法獨立學校制度。吾國行之已久。今人務摧殘司法。破壞學校。迺托爲復古。且飾其辭曰尊孔。實則所復所尊者。乃亡清之裨政。吾惟明孔子之道。揚古之美。毋淆於邪說。不亦可乎。足下書至。會迫賤事。行烈日中。四體不適。下懷多所欲言。殊不能悉。河山脩阻。覲面未期。翹首燕雲。曷勝惆悵。

熊升恆答李仲揆

陰歷十月。曾奉一牋。諒達左右。比承手教。賤西人功利之習。嘉中士退隱之風。甚善甚善。嘗謂仲尼論語一書。尙論商周數百年人物。稱逸民。只有七人。此七人者。固與湯武伊周同爲不世出之英也。自夫子表章之後。潛德彌光。流風所被。二千年來。學士大夫。爭自濯磨於名教之地。天爵之尊。不屑屑於勢位富厚。此乃傳之所謂天民者乎。然吾人充其天地萬物一體之量。則有不可以獨善者。故退隱之道。苟非萬不得已。必不出此。在易乾之六爻。龍不終潛。吾人知不可爲。而必爲窮居而不忘兼善。非功利之徒。所可貌襲亦異。夫冥然孤往者之所爲也。自士之賢者。以退隱爲尙。而政治之途。乃專爲貪人敗類之窟穴。風教遂以凌夷。民生遂以憔悴。其禍曷可勝言。竊謂釋家以生死爲大事。吾儒以進退爲大事。差之毫釐。謬以千里。屈伸曲當。是則爲難。隨時精義。在志士勉之而已。足下近來頗有所新知否。乃者省吾言。惟物派之學者。於人已之際。以各如其分爲鵠。終鮮仁慈愷弟之意。而易流於薄。此言未知有一節之當否。還質高明。以爲何如。



中國大事記

中日新約之正式簽字

中日交涉自一月十八日日使日置益向大總統提出要求條件五號共二十一款外交總長陸徵祥次長曹汝霖與日置會議二十五次至五月七日下午三時日置交出哀的美敦書中國政府即允日之要求五月二十五日陸徵祥與日置益將條約二種及互換文書十三件正式簽字於是此次交涉正式告竣

記者曰中日交涉又告竣矣今茲損失未知視甲午何如自今以後舉國上下其依然營私對付頑固守舊如甲午之後否噫

王鴻猷之忠言

鄂人王鴻猷上書大總統極陳時事一請宣布共和宗旨以息浮議二請決定維新主義以定國是三請選用真才以濟時艱其第一條謂近日流言厚誣大總統將帝制自爲殊不知總統鞏固民

國。鏗絕。帝制。早誓於當初。心迹皎然。神人共鑒。等語。一時政界聞之。羣稱爲言人所不敢言云。

記者曰王鴻猷之言忠言也彼見而異之者蓋卽王氏所謂佞諛粉飾以求容悅之徒耳。

蘇粵贛三省鴉片烟之通行

蘇粵贛三省禁烟特派員蔡伯浩氏自奉策令後將增加土稅貼用印花諸事商議就緒業於上海英租界仁記路外灘設立公所照章實行近聞禁烟聯合會上書政府勿因徵收二千一百萬元之烟稅爲飲鳩止渴之計不知言之可有效果否

記者曰刑律第二六六條云『製造鴉片烟或販賣或意圖販賣或自外國販運者處三等至五等有期徒刑併科五百元以下罰金』第二六八條云『稅關官員或其佐理自外國販運鴉片烟……或縱令他人販運者處二等或三等有期徒刑併科一千元以下罰金』第二七一一條云『吸食鴉片烟者處五等有期徒刑拘役或一千元以下罰金』第二七一條云『巡警官員或其佐理當施行職務時知有前六條之犯人故意不

即與相當之處分者。亦照前六條之例處斷。立法大旨。與清季之禁烟條例同。今者。貼用印花之烟土。通行三省。無阻其即。停止刑律。對於三省之效力乎。吁。可異已。

救國儲金

救國儲金辦法。倡自馬君佐臣。上海中國銀行。自四月九日開始收受。至五月杪。已收六十萬餘。北京開會兩次。收數十萬元。內地各縣。現亦預備勸集。大約最後之總數。縱未能如預言。原額。然較之三分重息之儲蓄票。七百餘萬。當有過之無不及矣。

記者曰。當茲時局。救國儲金之亟宜提倡。無待贅言。今所亟應熟計者。惟日後之用途耳。兵工廠等。為政府專責。非人民所得預聞。近有擬以此款擴充教育。振興實業者。記者竊謂。以人民直接籌集之款。辦斯二事。倘得實心任事者主持。不怠持之十年。收效必巨。不然者。執此區區補助。歲出一萬五千萬之軍費。庸有濟乎。

遠東運動會第二次大會

遠東運動會。自一九一二年。發起組織。一九一三年二月上旬。舉

行第一次會於菲律賓馬尼勒地方。總計菲律賓第一。中國第二。日本第三。本屆第二次大會。於五月十五日。至二十二日。在中國上海舉行。總計中國九十三分。菲律賓七十三分。日本三十二分。十種運動。以菲律賓薩菲道為第一。當二十一日。舉行八英里競走之時。與賽者共十人。日本計四人。此四人中。有二人。專為阻礙他國人進行之用。遇有他國健行者。追及其身。則彼有意蹣跚阻之。於前。若遇己國之人。則讓開前路。與賽者之英國鄧君。本可占得第一。因此乃落第三。旁觀者咸為不平云。

整頓國貨之計畫

農商總長周自齊。近因提倡國貨。鼓勵出產。為挽回利權之要著。特籌辦法數條。(一)乘時在各鐵路撥款。將各處製造廠。設法擴充。俾各路需用之機器車輛。本國可以製造。(二)請財政部減輕釐稅。俾新造之國貨。統捐較輕於洋貨。子口一稅後。任運何處。毋庸再納絲毫之捐。以便國貨之運銷。(三)無論何種工廠。有能爭先辦者。一概予以專利。以為推廣仿造之計。聞此數條。現正提出政事堂會議云。

外國大事記

歐戰近聞

坎拿大軍隊。近在伊泊爾作戰。殊極勇猛。坎軍以一師團。敵德軍四師團。德軍又附有重砲。坎軍仍能悉力抵禦。固守其地。德軍圖攻坎軍右翼。經劇烈之戰鬥。坎軍得有救助。奮力回擊。遂直薄德軍戰壕。是役坎軍一面。僅有墨塞將軍所領二大隊。及英軍一隊。而卒致勝利。(倫敦五月一日電)

諾威輪船亞美利加號。載重六千噸。索那號。載重七五三噸。伯耳溫號。載重一一二〇噸。均在北海為德潛水艇施放魚雷沈沒。但其船員均遇救他適。(倫敦三日電)

比國愛克化電稱伊泊爾附近。二日砲聲猛烈異常。佛蘭得斯全省。白魯克居室。荷蘭邊境村莊。均為震動有聲。實為開戰所未曾有之猛鬥。德軍損失。殊可恐怖。佛里米虛各鎮。及德軍所有各村。滿居德之傷兵。一日二日。有火車滿載傷亡軍士。經過蒂愛爾。戰局大利聯軍。比民聞之甚樂。(亞母斯丹四日電)

費蘭巨員帥。至圭克斯檢閱。致詞曰。余來特賀諸君近戰之成功。

大同月報 紀錄門 外國大事記

汝等得必斯叢林。繼以軍略上原因。奉命退去。余固知汝等非奉命令。決不捨此而退也。汝等由溫帶而來。然在冬月。戰爭仍甚勇猛。洵足稱譽。余固望汝等此後各戰。皆獲勝利。且深信汝等後此。遇有戰事。其果敢決不減於新福音堂村之一役也。

公報宣言。一日二日兩夜。他大尼里敵軍。以密集隊勇猛進攻聯軍。聯軍非但未嘗退走。且加土軍以重大損失。使棄其占有地位而退。聯軍現已進至加里波里半島中部。(以上均倫敦四日電)

公報宣稱。二日早晨。敵軍在斐斯圖拉右岸進攻。業被擊退。自一日夜間起。喀爾巴斯山附近。結續劇戰。塔羅附近。亦有惡戰。俄軍進占馬古夫克山。(俄京四日電)

瑞典商船四艘。向在瑞典各口岸貿易。滿裝糧食及煤炭。已為德潛水艇所捕獲。(哈爾濱六日電)

費蘭巨員帥報告。德人常利用有毒煤氣。攻擊聯軍。此氣或由戰壕內所安置之氣管放出。或由特製之開花彈放出。德軍之進攻者。則帶有特製之呼吸器。可見其於此經營已久。(倫敦五日電)

公報宣稱。前二星期間。德軍勇猛近攻三次。一在比利時。一在末

斯河附近。一在喀爾巴斯。均經大敗。其在法比兩處。損失及三千五百人。六師團之精兵。蓋已折去十分之一。

德軍在伯蓋太勒進攻。已全失敗。其餘前敵地方。惟伊泊爾之北境。及瓦果耳境域。現有劇烈之戰。

德軍復從兩處進攻。一在庇怒勒。一在香巴勒境域。經排鎗之射擊及鎗刺之衝擊。即行退走。本日早晨天氣甚惡。未有戰事。惟下午有戰。末斯河附近高處最烈。(巴黎七日電)

俄京來電。謂德軍攻入俄國西北境。原欲牽掣彼處大隊俄軍。使之無暇在克拉哥及喀爾巴斯中間作戰。今其計畫。已全破敗。德軍騎隊。已於三日向後退走。并在里巴與米陶中間鐵路線南面拋棄輕砲若干。悉為俄軍所得。(倫敦七日電)

美船魯西台里亞號被德軍擊沈。船客死亡確數尙未明悉。但知遇救者已有六百餘人。大富翁凡百比爾特氏聞已溺死。據遇救者云。船客為魚雷所傷害者極多。

公報宣稱。魯西台里亞號。共有二千一百六十人。已救起六百五十八人。撈起死屍四十五具。又據非官消息。船客在昆斯登岸後

已死二十二。船員除船長外大半殞命。(倫敦八日電)

世界各處來電。羣謂魯西台里亞之擊沈。為殘忍無道之極。美國報界。持論尤為嚴切。意大利報紙。則謂此事為戰事所生出最殘忍之駢枝。(倫敦九日電)

美人對於魯西台里亞船一事。評論日益激昂。竟有建議拒絕德國代表官此後之依禮款待者。(紐約九日電)

據新聞記者報告。有德意志逃兵。謂德人縛燒俘虜四十人致死。其行兇者。尚得有獎牌。又有謂十二月二十八號。英國俘虜二十四人。為其同伍所銃殺。其時該軍正涉橋追擊後退英軍。此等俘虜乃排列由其新兵輪次銃射。該隊各兵。大致皆曾習為斯事。發此命令者。乃軍官耗夫門及紐彌。又某次有英軍官一。兵士四。在荷里拜克為德人圍困格殺。該逃兵等所以逃亡之故。因軍官待遇彼等。既極粗暴。而糧食又苦缺乏。彼等常枵腹從公云。(倫敦十日電)

政府委員會長布拉斯子爵。昔嘗為駐美大使。宣示報告。謂委員會詳加調查。認明前傳殘殺婦孺俘虜。及焚燒虐待諸事。皆屬確

實。德人慣於殘殺無罪之人。暴污婦女。殘害幼孩。而此等殘暴之事。皆奉其官吏之命令而行。又謂德軍前隊。慣用婦女幼孩作自衛之盾。軍人慣行殺害傷病之俘虜。軍隊濫用紅十字旗及白旗以行其詐。均極違背戰法。實爲近三百年所未曾見之事。(倫敦十二日電)

官報宣稱。南斐聯邦首相波薩將軍。已入德屬斐洲西南部之首府溫德賀克。并有遇有抵禦。已懸英國國旗。該地共有歐人四千。斐人一萬二千。又有貨車甚多。波薩將軍占據此地。已經宣布軍法。此事與英國及南斐聯邦。有重大之關係。因占領溫德賀克。即無異占領德屬斐洲西南部之全境也。(開浦鎮十三日電)

公報宣稱。昨夜比軍在伊塞爾河之右岸。擊退進攻之德軍。德軍退去時。遺有死骸數百。

又法軍在亞拉山北。得有重大之勝利。獲有野戰砲二尊。白砲三尊。戰壕白砲十二尊。機關鎗多枝。來復鎗三千枝。并其他之軍用品無算。法軍進占亞布奈村。俘敵數百。復進攻勒維爾聖伐。獲砲十七尊。白砲數尊。德人於亞貢之白蓋太勒。進攻二次。均被擊退。

泊萊特叢林。現完全爲法軍占領。(巴黎十三日電)

公報宣稱。德軍在斯台斯特拉境。三次進攻。第三次尤爲勇猛。均被重創而退。法軍獲機關鎗六枝。重砲一尊。(巴黎十六日電)

公報宣稱。德軍下午復在斯台斯特拉爲第四次進攻。業被逐退。英軍在番斯土倍爾附近。獲有全勝。德軍受創。甚屬鉅大。

香巴勒維爾須土爾白之德軍。星期一夜間。在法軍之第一戰壕線後。炸一地雷。繼以軍士八隊前撲。占一立足地。法軍以鎗刺炸彈。回攻二次。奪回失地。且大創德軍。戰壕覓有屍骸千餘具。俘獲三百七十七人。內有軍官十二員。(巴黎十六日電)

公報宣稱。法軍在海薩附近。廣續前進。得有防堡一所。并於伊塞爾河東境。超過德軍第一戰線。獲有俘虜及機關鎗各若干。敵軍雖會回擊。完全失敗。法軍又於洛來特聖母院附近獲勝。敵軍進攻四次。全被擊退。且受重創。

德軍升青色之土耳其旗。意圖感動回回教徒。及斐洲軍隊。但彼等即以排鎗答之。并將該旗奪得。(巴黎十七日電)

巴塞北方之英軍。星期日夜間。受德軍猛烈之回攻。結續勇戰。於

星期一日。奪得德軍戰壕數道。并加德軍以重創。

德軍一支隊。計七百人。在英軍機關鎗德軍大礮之間。全數覆沒。

英軍俘德軍一千人。且得機關鎗數枝。(巴黎電)

據苦魯金親王電稱。德國騎兵焚死俄國傷兵若干。(俄京電)

英軍在番斯士倍爾之攻擊。乃此次戰事礮隊中最優之成績。英

軍礮火。轟擊敵軍鐵條障礙物。最有力。而損失尤較預計者為

輕。德軍原意英軍缺乏礮彈。繼聞礮聲隆隆。不勝詫異。德軍原謀

於十五日猛烈前擊。詎意至期徒見礮隊被制。陣線被破。損失極

鉅。德軍於伊泊爾最後一役。損失至十五萬人。現以援軍調撥之

事。難於實行。德軍謀略。已著失敗之現象。(倫敦十八日電)

公報宣稱。比境德軍。於伊塞爾河左岸。遺棄屍骸二千具。來復鎗

多枝。法軍於新得地位。已設防固守。昨夜以大礮與炸彈轟擊後

回攻甚猛。受挫而退。沙歇境之德軍。回攻兩次。均為我軍礮火所

阻。法軍夜攻。奪獲亞白萊房屋數所。亞拉北全陣線。現礮戰晝夜

不休。德軍尤注意轟擊亞拉。今日法軍俘敵若干。德軍在布理約

巴克進攻。候被擊退。(巴黎十八日電)

布克荷夫那奧人騷動。奧人前在西加里錫所得利益。致全喪失。

自里斯突至普魯斯各地。現全為俄領。奧軍創敗之後。逃亡失序。

前耗財喪師設防之地約百英里。現已捨去。(俄京十八日電)

經六日之劇戰。法軍終於亞拉北部獲勝。破俄軍戰壕五道。并攻

克勒維爾聖伐及克能塞二要塞。(巴黎十九日電)

德奧土三國駐意使臣。現離羅馬。德人利益由瑞士公使代理。奧

人利益。由西班牙公使代理。(倫敦二十一日電)

奧邊境軍界。已將郵件退回。斷絕郵電鐵道交通。(同日羅馬電)

意國駐在柏林使臣。二十日晚間。自使館外出時。受有侮辱。帽被

擊落。暴徒業已就獲。德首相外相相隨往道歉。(亞母斯丹念一日

電)

意大利北部各省。亞德里亞海濱島嶼郡邑及各礮臺。宣言自二

十三日起。入於戰爭之狀態。(羅馬二十二日電)

意國來電。意民愛國熱潮。湧徧全國。米蘭激昂尤甚。然無擾亂舉

動。各殖民地意民。亦電陳願聽調遣。

載兵專車。南駛至卡來爾附近。與慢車相撞。兵士死者頗多。傷者

三百兩車皆被火焚。(倫敦二十二日電)

意國已向奧國宣戰。二十三日意國致奧國宣戰書。謂意國因奧國破敗盟約。故廢棄該約。且謂意國不能放棄責任。不以應有方法實行全國之謀畫。免除現在或來之禍患。故意大利以爲自五月念四日起。當與奧國入於戰爭狀態。(倫敦二十二日電)

敵軍在北海及亞拉中間進攻。重創而退。復進攻勒維爾聖伐兩次。終被擊退。德軍又在亞貢炸地雷數枚。嗣以勁旅圍奪炸陷之地。亦被法軍部隊擊退。敵軍完全敗北。(巴黎二十三日電)

海軍部宣告英潛艇E字十四號成績。在瑪摩拉海擊沈土礮船一艘。運船一艘。三日沈礮船一艘。十日沈運兵船一艘。十三日迫令一船擱淺。該潛艇已於十八日安然駛回。(倫敦念四日電)

意國人民異常興奮。國會議員幾全聲請入海陸軍效力。各廠工人多以婦女代理。動員事於數日內完竣。(羅馬二十四日電)

奧國飛機攻擊威尼斯兵工廠。旋被逐去。又攻柯錫尼及安可拉。爲意飛機逐去。奧斥候艦及魚雷驅逐艦攻擊普里亞省巴勒太。爲意國軍艦及驅逐艦擊退。(羅馬二十四日電)

敵軍現固守夏夫里。俄軍在克里芒土夫境。擊退奮力回擊之敵軍。俘敵千名。復在里斯特河附近進攻。俘敵兵九百。(同日俄京

電)

洛萊特高地。乃德軍所視爲堅不可拔之要塞。經十三日之劇戰。遂爲法軍取得。是役誠爲最光榮之勝戰。(同日巴黎電)

加里邊界。奧礮攻擊意軍地位。未有效果。意礮回擊之。意軍已沿佛里宇里邊界攻入敵境。奧軍抵抗頗弱。(羅馬二十五日電)

俄國外相薩沙洛夫。與路透訪事晤語。謂意大利加入戰局。戰爭之期間可以縮短。(俄京二十五日電)

意大利加入戰局後。德國對於美國牒文所主張之態度。顯有變更。德國現請美國准其緩期答覆。聞擬大加讓步。以免再與美國起有波瀾。(亞母斯丹二十五日電)

十一日夜。法軍會同英國海軍。在土境作戰。前進頗深。受損極微。領土兵師團。亦進至新陣線而固守之。(倫敦二十五日電)

費蘭巨員帥報告。伊泊爾東面英軍陣線。爲德軍煤氣攻擊。失地若干。此次德人所放之有毒煤氣。濃大爲前此所無。於五哩長之陣線前。噴射四小時半之久。且以含有此氣之礮彈進擊。英軍陣線煤氣有昇至四十尺者。現在英軍於未損失之部分。仍行固守。并設有備禦。敵軍苟再以此法進攻。必能勝之。(倫敦二十六日電)

布俄將軍報告。土軍於休戰時。掩埋死骸三千。損失可謂鉅大。英艦偉大號（一四九〇噸）於掩護加里波里戰事時。為敵軍潛艇發魚雷擊沈。艦員等幾全遇救。（以上均倫敦二十七日電）念四日考錫尼與巴勒太兩口岸有海戰。奧魚雷艇一。驅逐艦三。斥候艦一。悉受重損。并死多人。意軍自沈一驅逐艦。

意軍在台洛爾與特蘭狄落邊界。已進占至伊特洛湖并迦達湖之北。及兩湖間之險要。大受居民歡迎。（均羅馬二十八日電）

法軍復在安格勒擊退回攻之敵軍。現法軍仍在聖拉才勒及亞白蘭續取攻勢。已獲完全勝利。占據營地外之房屋若干。及亞白蘭東面之凹路。并加德軍以重創。俘敵四百人。獲礮十二尊。

英軍在拉巴塞地方得有進步。敵軍在安格勒。於念四小時。回攻七次。均甚猛烈。均被擊退。現安格勒及亞拉間。終日戰。甚為劇烈。聯軍守護各陣地。甚為堅固。（巴黎二十八日電）

柏林公報承認加里錫之俄軍。已在錫尼亞。將德奧軍逐過桑河。德軍有礮若干尊。不能攜走。（亞母斯丹二十八日電）

德首相在代議院中。痛詆意國。謂其為協約國所威嚇。且受賄賂。并斥意國執政之無信。不願條約義務。議員聞其言。鼓掌如雷。其狀若狂。可見德見意加入戰局。既怒且畏。（亞母斯丹念八日電）

德軍不願損失。在蘭斯及斯台斯特拉特間。奮力進攻。圖取加萊。六〇山現英軍仍固守之。星期一。德軍在聖台洛瓦附近以煤氣進攻。英軍答以麥肯礮。德軍死者甚多。積屍高至六尺。英軍現取守勢。惟已在拉巴塞南面進攻。該地防禦亦殊完密。（同日倫敦電）

攻擊魯台維夏方之飛機。安然駛回。惟一艘被德人擊落。（巴黎電）

各國近信

利勿浦商界。已決議拒絕與德人與人貿易。雖已歸化者。亦在拒絕之列。波羅的及瑪克里商界。亦有同此現象。（倫敦十日電）

英國內閣。原由政黨組織。刻因戰事重要責任。須由全體國民。共同負擔。戰時政事。應使各政黨共同與聞辦理。現已將內閣改組。凡在野各黨。一律加入閣員。合同辦理戰時政事。（倫敦電）

葡萄牙革命黨起事。倡始者乃駐太格斯之海軍分隊。柯印姆白拉哇帕士桑太倫里斯本均有亂事。交通均斷。（瑪德里十五日電）

葡萄牙革命目的。在改組內閣。以保衛鞏固民國。現已議定革黨概免加罪。即照其議改組內閣。秩序已經恢復。（里斯本電）

命令

大總統策令

江蘇巡按使齊耀琳呈送南通縣自治成績清冊。請將原辦各紳張謇張謇等。特與褒揚等語。正任農商總長張謇。壯年通籍。歸隱鄉閭。小試經綸。蔚成宏業。披覽成績各冊。莫然大觀。凡地方教育實業。及一切自治事宜。弟昆競爽。甘苦咸同。遐邇聞風。爭相倣效。遂使偏隅一邑。聲譽爲全國之冠。該總長兄弟。毅力熱誠。洵堪於式。著特給觀鄉知道匾額一方。以爲熱心自治者勸。其在事捐貲較鉅各紳民。並交內務教育兩部。行查職名。按照條例。量與褒揚。用昭激勸。此令。四年四月二十二日

據本任農商總長張謇呈。稱鄉事羈牽。懇請免去部職。專任局務等語。該總長以實業專家。入長部務。成績卓著。衆望咸孚。前以本籍公益事宜。諸待整理。歷經籲請開缺。專任水利局事務。環顧實業人才。罕與倫比。是以始終慰留。迄未准許。茲據滙陳國家地方勢難兼顧情形。語出至誠。未便強爲敦促。張謇准免去農商總長本職。仍任全國水利局總裁。俾便南北往來。藉資贊畫。此令。

據內務總長朱啓鈴。稅務處督辦梁士詒呈。稱江蘇江西廣東三省私土運入頗多。亟應從嚴查禁。請派員會同地方長官暨海關員。司設法查緝等語。應派蔡乃煌充江蘇江西廣東禁煙特派員。此令。四月二十九日

大總統申令

據財政部呈。現行會計年度。以每年七月一日開始。至次年六月三十日終止。而實際分配經費。均以年分計算。辦法參差。治絲益紊。且與立法院開會議決預算之期。不能銜接。請將會計法所定會計年度。即行修正等語。吾國會計年度。自古以歲律爲準。冢宰制用。必於歲杪。自改今制。吏未習而民滋疑。且於分配經費。實行預算。均有窒礙。應即准如所請。改正會計年度。自四年起。以每年一月一日開始。十二月三十一日終止。以便實行。即由政事堂飭法制局。將會計法所定會計年度。即行修正。呈候公布。此令。四月二十日

據參政院呈。稱爲建議事。前清末季。國勢陵夷。海疆多故。沿海要塞。或因故讓與外國。或爲外國所租借。以致險要淪陷。軍防無所

憑藉。庶民不得安枕。於設險守國之義。大相背馳。茲特建議呈請政府。於創鉅痛深之後。爲懲前毖後之謀。明令陸海軍部暨海疆官吏。注重海防。使沿海居民。得以安居樂業。並宣告天下。嗣後中國所有沿海港口灣岸島嶼。無論何國。概不允認租借或讓與。務使本國堅固圍之心。而國際共享升平之福。全國幸甚。茲於五月十二日大會。提出討論。全院一致議決。謹提出建議。呈請公布施行。等語。查海疆區域。關係國防大計。亟應詳審綱繆。該院建議。洵屬慮遠大。特加宣布。嗣後中國所有沿海港口灣岸島嶼。無論何國。概不允認租借。或讓與。並著陸軍海軍兩部及海疆官吏。力負責任。妥爲籌防。以體鞏固國權之至意。此令。五月十三日

大總統批令

河南巡按使田文烈呈福公司鑛案完結謹將辦理交涉情形並正草合同章程附件呈請核示由

呈悉。交農商部查照備案。並轉行該巡按使遵照。并交外交交通兩部查照。附件並發。此批。四月二十三日

農商部呈請派袁克文爲福中礦務總公司副督辦並請作

爲簡任以符體制由

如呈備案。此批。五月二十二日

湖南巡按使劉心源呈知事辦案錯誤跡涉刑事範圍擬請先行褫職發交法庭訊辦請示由

呈悉。此案既據查明彭楚錫實係赴縣投審。應以自首論減。該知事會鏡心官聲甚好。於審理此案。并無受賄故從輕比情事。著毋庸置議。交內務司法兩部查照。此批。四月二十六日

江蘇巡按使齊耀琳呈江寧地方檢察廳焚燒煙土發見偽質請將該檢察長劉鴻樞從嚴懲戒由

呈悉。該廳焚燒煙土。攙雜偽質。檢察長劉鴻樞。責成所在。實難辭咎。著先行褫職。交司法部從嚴查究懲處。此批。四月二十八日

司法部呈恪遵申令嚴行監督司法事務由

呈悉。據陳近年司法情形。認真督察。具見苦心。所擬凡有始勤終惰。罔知自愛之員。試署者立予撤換。實任者量予懲戒。應即照辦。至審限既經明定。亦應切實奉行。務期官盡賢明。獄無冤滯。用副軫念民艱之意。此批。五月十三日

文牘

都肅政史莊蘊寬肅政史夏壽康周登暉徐承錦夏寅官張

超南江紹杰雲書方貞程崇信孟錫珏傅增湘麥秩嚴呈爲

外患日深救亡宜急謹合詞上陳伏祈鈞鑒文

爲外患日深。救亡宜急。謹合詞上陳。伏祈鈞鑒。事。竊自歐戰一開。均勢已破。國人咸知禍至之無日。繼而青島之戰。痛告終。日本之要素開始。當局堅持數月。卒以審慎圖維。出於最後之承諾。此原於前代積弱之遠因。蘊寬等亦不敢過爲高論。專歸咎於外交之失策。然觀條件之嚴酷。意義之廣漠。此後棘地荆天。幾於不可爲國想。大總統宵旰憂勞。必早計慮及之矣。蘊寬等竊維國勢雖極岌危。斷無束手熟視。坐待滅亡之理。正惟人人知其將亡。而忍痛茹辛。上下一心。庶幾有挽回之望。蘊寬等熟察近事。默審國情。謹條舉數事。披瀝上陳。惟垂神采擇焉。一曰減省軍費。以充軍實也。我國陸軍。號六十萬。歲費一萬五千餘萬元。占全國歲入三分之一。而臨事尙不敢一試。誠可痛心。查日本常備之兵。約五十萬。歲費不過八千餘萬元。僅及我國之半。相懸如此。寧無浮冒。急宜

比較大加裁減。又改革以來。臨時召募之冗濫。各省巡防之殘餘。皆不足言。兵宜分期汰盡。其各將軍等統兵大員。應痛加申誡。激發忠良。常存男兒戰死之烈心。勿作亡國富翁之夢想。如有缺額。濫支及驕桀不馴之事。尤應嚴加裁制。以肅軍紀。別飭部長將節餘之款。爲逐年擴充兵工廠及一切儲備之用。軍實既充。士氣自壯矣。又腹地各省陸軍。常二三萬人。大半屬集於省城。不知果何所用。或有以代巡防者。無論於民情不宜。卽爲國家計。亦有騷擾捕鼠之譏。若酌量抽減。以警備填之。所省亦當不少。一曰嚴核浮冗。以裕財政也。財政艱窘。至今而極。借貸既窮。繼以搜括。去年鹽款之收入。皆鹽飭加價所得。其去前清原額尙遠也。公債之發行。皆官強派而致。更與人民樂輸無涉也。當事者皆以此見好於上。而還自以爲功。凡此等欺飾情形。計必難逃洞鑒。今則公債又事分攤。鹽商重加報效。儲蓄票以三分之二之重息。僅得七百餘萬之用。本年無著之八千萬元。不知部中何以應之。夫支出之數。軍用爲首。行政次之。前者明令煌煌。飭中外嚴事裁省。乃外則軍署之用。以江蘇湖北廣東爲最鉅。巡按署公費。大抵視軍署減十之六七。

而廣東獨歲費二十六萬。與將軍等皆不聞痛自損抑。內則交通內務。最稱冗濫。乃與各部率空文塞責。徒知各私其利。而無絲毫體國之心。其餘冗局。自上公府下及曹署。領空名而靡廩俸。不知凡幾。錙銖取之泥沙。用之可爲歎息。謂宜重申嚴令。厲行核實。凡重迭之機關。不急之局所。冗散之員。司兼薪之差。使概與刪除。更請大總統自禁近之地。首行裁減。以示表率。蓋必經常之用。稍有範圍。而後要政進行。乃可著手。不然日日憂貧。而在在浪費。困窮之極。其禍有不忍言者矣。一日整飭吏治。以恤民生也。夫今之民苦矣。一苦暴民之恣橫。再苦兵隊之騷擾。三苦盜賊之肆擾。而水旱之災。不與焉。當事者徒見城市之熙皞。以爲秩序恢復久矣。不知窮鄉僻邑。流離轉徙。以求一夕之安。而尙不可得也。我大總統關心民瘼。申徹至於再三。然而蘊寬等觀於本廳。人民之陳訴。而與各處采訪所及。則仁聲每不下逮。而疾苦常不上聞。舉凡改徵驗契。禁煙緝黨。諸事。幾無一不爲官吏詐財害民之資。推原致此。蓋亦有因。巡按本專民事。而用人行政。多受持於將軍。於是腐舊之官僚。獷悍之營弁。皆出而長民。社弊壞不可爬梳。而巡按

轉不負其責。事權不專。此其一。自保舉考試之途開。每省分發。恆數百人。壅塞仕途。願者情乞。貧者賄求。加以巡按任用。率循私情。故冗闕所在。皆是流品太雜。此其二。部令省令。急於星火。細如牛毛。刻期而集。事賢者奉行。以免過劣者。更假其名。以肆虐法。令太煩。此其三。自治議會。相繼取消。司法徵收。迭加委託。權專而責重。在才賢者可發舒展布。而藉以恣行威福者。乃十人而九。監察太疏。此其四。有此四弊。無怪法令視如具文。而困苦深於水火。竊恐隱忍寢久。漸易搖動。甚非國家之福。我大總統欲靖民心。塞隱患。其必自吏治始矣。一日廣求人才。以應時變也。自古一代之人才。往往由一二人倡導。於先久之遂成風氣。而國家終收其用。我大總統久宏延攬。前在北洋。有人才淵藪之稱。登進之士。皆有積效於時。乃改革以來。而政府用人。轉有乏才之歎。毋亦時變日宏。而進用之範圍。或隘栽培之方。宜改歟。蘊寬等觀近年。慶於元二年之患。用人多趨於舊。竊謂過矣。夫新學不足。與謀事誠有之。然其才地優秀。志趣正大者。似宜置之。政地俾歷練。事實爲後來任用之地。大抵舊人富經驗。重保守。新人富思想。銳進取。然各

有偏弊。各相輕詆。是在大總統調劑裁成之妙用耳。又一年以來。制禮樂。修書史。行考試。世人頗疑復古潮流之太盛。近者復科舉之謬說。方且騰播。而未有已。不知今日乃救焚拯溺之時。決非鼓吹休明之日。凡此舉動。不特國家風氣所繫。抑亦外人視聽所關。甚願審慎而出之也。至於使詐使貪。取一時之便利。召徒樹黨。攘無數之利權。尤足敗壞風氣。沮抑人才。惟容讓必早澄照及之。無俟蘊寬等之陳說也。以上四端。大抵就目前之弊。爲補救之方。至於根本之圖。尤宜早計。撮其最要約有二端。一曰普及教育。軍興以來。新舊之交爭。財政之束縛。學校幾於停廢矣。幸賴大總統毅力主持。讀本年元日之令。及新頒教育綱要。所誥誡及籌畫者。至詳且盡。然分年籌備之事。如學童之調查。師範之預備。辦學人才之養成。皆非旦夕可幾。宜飭部嚴督進行。及早籌畫。乃有實行普及之日。不得舒緩。有誤程期。蘊寬等尙有過慮者。國家政策既定。當一意推行。若窳財者以減削經費。聽民自辦。爲言守舊者以考試科目利祿誘進。爲說皆足摧殘教育之生機。淆惑人民之觀聽。願大總統之勿采也。夫普及教育。乃增進一班人民普通

知識。予以自立之技能。然後足與世界相競爭。與人才教育。截然不同。若國家僅有少數之高深學問家。而一班人民蠢然如未開化。不特無以立國。其終必至亡種。此不可不急爲警悟也。一曰振興實業。中國言實業者數十年。而收效殊鮮。此無他。辦事者無專門之知識。學問而政府。除收稅外。漠不一視。其傾敗宜也。然從前專門學校。所造者不過高等普通之學。今宜派大學畢業者。留學歐美。注意實習。歸國後當就所學。分布各地。助理練習。勿閑置都中。或遽授重任。以驕惰其志氣。政府更視吾國內所需要各事業。極力提倡之。提倡之法。不在虛名。而在實事。一補助資本。一減免稅釐。一推廣銷場。一謀便交通。並責成承管官吏。盡力維持。成立補助。進行之責。蓋必竭一二十年之全力。以保護栽培之。俾人民先收其效。而國家亦旋獲其利。不然。日日言塞漏卮。用國貨。而生計。乃日緇大利。乃日溢專門人才。皆四散而無所用於國家。亦何補哉。總之時至今日。變深禍亟。本無奇謀秘策。可以拯起沈淪。然卽榮榮數端。急起直追。則救國之機。或在於是。今者條約初定。國人經此奇辱。相與慷慨激昂。其志亦至可嘉。然古來報仇雪恥。要

皆沈毅堅苦戰兢惕厲。豈在叫號。囂就予人以共聞。我大總統智勇深沈。擔負艱鉅。久為全國所共信。伏願臥薪嘗膽。為國民倡。國民更搏心壹力。為政府助。勿一闕而即散。勿事過而輒忘。痛瀕近年之積習。嚴策後日之進行。毋以根本之事。為迂圖。毋以權宜之策。為久計。去宿疾。方可以樹新基。裕民生。即所以培國力。救國救民。別無他冀。惟仰視大總統心力之所至而已。時危事迫。不暇擇言。不勝悚惶待命之至。謹呈。

大總統申令。據都肅政史莊蘊寬等呈。稱國勢岌危。救亡宜急。條舉目前之弊。根本之圖。而歸結於沈毅堅苦。戰兢惕厲。以救國救民。披覽所陳。至為剴切。予以薄德。承人民推舉。遭大投艱於其身。比年以來。支持危局。負辱負重。救過不遑。每念國勢之未寧。民生之不易。中宵惕息。憂憤填膺。冀與我文武百僚。共矢精誠。痛瀕積習。乃秩序雖漸恢復。而風氣未盡轉移。長此因循。更待何日。曩者初經改革。戎馬倥傯。一切措施。往往兩害取輕。容有隱忍。牽就之處。急於治標。而緩於治本。日不暇給。無容諱言。今則內亂已平。民心漸定。而殷憂未艾。來日大難。若復上下恬嬉。毫無振作。叫囂凌

競。事過輒忘。則前途何堪設想。歷觀史冊。興亡之故。不在外禍之可慮。而在內政之不修。我文武百僚。應念列國之何以富強。我國之何以貧弱。勿咎人之侮我。而思我之何以受侮。惟有洗心滌慮。痛自鍼砭。汰無用之冗兵。裁不急之浮費。慎選愛民之良吏。勤求適時之人才。凡有益於國者。勿以小善而不為。凡有損於國者。勿以小惡為可撓。至普及教育。以增進人民之道德。智識。技能。振興實業。以利用國家之地力。人工。資本。尤為百年之大計。列邦之成規。亟應切實進行。務規久遠。著京外各署。按照該都肅政史等所陳各節。實力整頓。人人各盡其責。而毋委過於他人。事事取法於人。而勿自封其故步。矢嘗膽臥薪之志。當救焚拯溺之時。予與文武百僚。責無旁貸。勉旃。毋忽。此令。



哲學類

德國哲學家聶奇學說之概要

莫安仁

第四章 道德

聶氏反對國家有與國家並爲世人所重而國家賴之以維持者。道德是也。氏惡國家乃亦惡道德。自道德與國之關係言之。國家者何以自然成立而非由勉強。何以爲多數組織而非由一二人之剝造。何以爲庸衆結合而非由豪傑之聚集。推厥原由皆由道德爲之根本。宇宙間庸衆多而豪傑少。國家之宗旨重在保全多數。故多數庸衆謀其幸福於無形之中。相率而贊助國家之成立。而問國家何以統保多數不利此而害彼。其辨護理由必曰道德。故人民心理羣以道德爲國家太平之元素。有道德則安無道德則危。一國之中法律典章文物制度罔不以道德爲淵源。故國家之立謂其本於道德可也。此國之不可離道德者一。

自道德與人之關係言之。人生而知好善惡。惡區別善惡之觀念。卽道德爲之主也。世界各國自古及今。若聖若凡。若賢若愚。無不以道德爲本思想。家尙道德。事業家亦尙道德。惟心派重道德。惟物派亦重道德。德國哈克爾 Haechel 惟物派鉅子也。其論人亦云。不可須臾離道德。宇宙間無論何人。無論何事。皆依道德而決定。康德斐希脫 Fichte 諸氏之言曰。人爲萬物之靈。以有道德。人與人相處。此人之世界也。而尙有一道德世界。立於人世之上。以爲人世之主宰。人之一言一行。不能自由任意。而於無形之間。覺其應該如此。不可不如此。所謂應該。所謂不可不。卽道德世界。致人若是也。天演學者所謂天擇物競。卽此二世界相爭之現象也。人之進步。文明。皆由道德。道德及人深者。人之文明。進步程度愈高。愈無道德。則愈野蠻。此就人與人相爭之點而知之者也。至就一人言之。一念之動。合道德者爲理。背道德者爲欲。道德淺薄之人。欲嘗害理。而一時良心發現。亦極知其不是。此良心者。非道德驅之以勝欲者。耶人誠時。時以理勝欲爲念。則時趨於文明。故人類者。依道德而生活者也。此人之不可離道德者。又一自宗教與道德言之。宗教具提倡道德之能力。輕人世而重道德。世界宗教開人之眼。使人見道德世界之光明。吾人知道道德有益於人。而不可須臾離者。皆由研究教旨而得之者也。基督之言曰。世上美物。悉由上帝給予。道德者由上帝定之者也。吾人奉基督教。尊崇上帝。卽不可不尊重上帝所定之道德。故道德得宗教之助。而其效力乃愈廣大。世人或謂康德等講論道德之書。艱深奧衍。不易卒讀。而基督福音。

稚子婦人聞之皆能了解是道德於人未若基督福音之便利者不知康德著書艱深難讀此書之關係非道德之關係也道德倘有背於宗教誠不足取若不然者道德之理蘊悉與教旨符合則上帝創造以賜世人之美物安可須臾違之此宗教之不廢道德者又一

綜右所說可知道德者不可須臾離者也而聶氏之學說則不然

氏之宗旨在舉自古以來普通尊重之事物悉除而去之國家者衆所尊重氏反對之道德者亦衆所尊重氏亦反對之昔人以道德在上萬物在下而氏則謂自己在上道德在下昔人以人聽命於道德而氏則謂自己左右道德而道德不能左右自己蓋氏之所主張者皆反乎道德也人羣處於社會不可無一規則以定人我之界限氏於此種規則謂宜將社會中之人分爲兩級一多數之庸衆一少數之偉大人物其名一爲主人一爲奴隸一切規則皆依此二名之性質而定昔人所尊重若仁愛若慈善若忠恕若寬厚氏皆不取氏所取者曰剛猛曰暴虐曰專橫曰利己一言以蔽之曰不道德而已

氏之立論若斯怪誕其由氏自矜耶抑襲前人之議論耶先於氏有沙烹霍爾者於康德學說亦嘗有所訾議惟沙烹霍爾以道德於人有益猶謂人不可無道德氏則不然意謂道德無益於人昔爲庸衆所尊重衆力所助莫敢菲薄自古迄今許多通才博學於道德之是非未見有爭點者蓋皆爲庸衆所惑耳今之世界非昔之世界往日思想拘執不化今日無所用之今應發明新法以代往日之舊法舊者不善而

新者善。新者足重。而舊者不足重。昔人苦無新法。今有之矣。予初此新法。予先反對舊法。予望世人從予新法。尤望世人盡廢舊法。舊法維何。道德是也。道德由庸衆之思想而生。非自然而成。宇宙間萬有之物。除人之外。未有講道德者。可知道德不能通於萬物。成於自然。昔人稱道德在萬物之上者。皆謬言也。氏反對道德之大旨如此。

宗教家論道德曰。道德造自上帝。非生於自然。猶夫人之造自上帝。而非生於自然。道德之範圍在上帝範圍之中。基督聖經曰。人信道德。由於上帝爲之主宰。人受上帝之訓示。生而性善。若行事反乎道德。卽爲得罪。上帝康德說。人不得任意有所謂應該者。所謂不可不者。爲之主動。其言亦與是合。蓋道德之力。既大且尊。發生於神。而非發生於人。其根柢深厚。非表面浮淺之事。所得比擬。人既崇奉上帝。卽不可不崇奉上帝所創造之道德也。斯爲宗教家之恆言。

聶氏於此類學說。其據爲口實者。在康德諸人以人類應受道德。宗教之約束。而道德。宗教之所出。未能明言。此氏所最不服者也。康德之言曰。一萬物實體之究竟。非人之腦力所能見。及人之思想。既未能證明。實體則人不能謂無上帝。無靈魂。可以長生不老。一氏之意。則以本無上帝。無靈魂。何所用其證明人之思想。有不足者。以其人非偉大人物也。若既爲偉大人物。則一切思想。悉由自立。偉大人物所謂爲是。謂爲非者。卽是非之所在。初不以外界之影響而後確定。此氏主張之要點也。

(未完)

政治類

俄國之酒禁

王調生譯

人類史中完全實力奉行酒禁如大戰後之俄羅斯者從未之有因之吾人欲觀禁酒所生之結果常無其機會昔者合衆國及他之各邦固嘗申其禁令矣因辦理之不力乃不克現良好之徵象英國亦嘗禁賣酒液而私售私沽仍所時有於是酒禁對於社會之效果乃未由見現今俄國全國厲行酒禁吾曹乃得其機遇以觀酒禁對於社會之效果矣

飲酒一事其在俄國害及社會害及經濟當較歐洲各邦爲甚各邦銷酒之多於俄者可以十計惟其害於個人社會國家則決無俄國之巨是其原因有二一在飲酒之狀態一在飲酒之地點

飲酒惡果恆生於過量其理至明試設例言之有酒一斗均分作千次之飲料及時而飲何至醉亂有酒一斗分作數次之飲料持續飲受其必因過量而醉亂也明矣醉之輕者昏迷病臥醉之重者毀物傷人致罹刑網其不幸何如俄人之飲酒頗似後說銷酒之量不及他邦而害較甚者其故蓋可知矣

不寧惟是俄人所飲之麥酒俄政府之專賣品也按其定制每次發賣之最低額爲酒一瓶酒肆以內不許飲酒因之俄人沽得麥酒或攜飲於道途或歸飲於家室因飲酒於家室之內遂生勸令妻子同飲之事昔者俄地各村酒家除扶歸醉人而外乃女子足跡所不履自專賣制興鄉村之酒肆閉歇俄民飲酒

多在家屋。妻子被其沈醉之夫。或父逼令飲酒者。乃日益多。俄國家庭。乃有飲酒之風。由家庭更推諸學校。而社會之被其毒者深矣。據近時調查。俄地婦女之飲酒。乃尋常之事。而學校中男女生徒。慣於飲酒者。亦占百分之四十。俄國社會受酒害之較巨者。此又一原因也。

俄國社會於飲酒之弊。害知之甚明。竭力籌節制之法。惟政府以酒液專賣之收入。占全國入款三分之一。因之對於戒酒事業。戒酒會社。決不。予以鼓勵。而且反其道以行。以限制麥酒專賣之事。定諸刑條。百分之十之市鄉議會。規定禁酒法。則而地方官吏。京都政府。確實認許者甚鮮。以故行之有實效者。其數亦甚微。言政府專賣酒液之初意。原在節制人民之飲酒。嗣後軍備擴大。恃賣酒之收入。應支出之用。乃惟恐人民飲之不多。收入受其影響。而酒液專賣命意之所在。遂全然更易矣。

戰事既興。政府於戎馬倥傯之際。欲順民意。以弭內患。乃暫停麥酒專賣事業。是之一舉。既絕供給之源。復止售賣之事。而其効力。遂爲空前。所未有。通俄羅斯全境。於四十八小時以內。飲酒一事。即全停止矣。麥酒專賣處。既經停業。全國省議會。市鄉議會。會社個人。莫不上書政府。請其永勿復設。而慣於飲酒者。當麥酒供給未絕之時。雖不能自爲節制。然亦未嘗不知飲酒之害。故此。時亦異口同聲。願麥酒專賣處之勿復再現也。

俄及國務大臣。於國民之輿論。既經明悉。初意麥酒專賣。雖僅停至八月二十五日爲止。至期乃復展

至十月一日。歷日既久。酒禁之仁惠效果。愈益徵明。而人民之上。書請願。更覺懇切。俄皇及陸軍大員。帥乃更展酒禁期限。至於戰事完結之時。并推麥酒之禁。兼及火酒啤酒等各項酒液。且宣示公衆。決將麥酒專賣制度廢棄。永不復行。於是俄羅斯全國。盈兆之農戶。十兆之鄉婦。感激之餘。繼以懽呼。同聲感謝上帝矣。

今者俄國禁酒。閱四月矣。改良社會之優異效果。竟軼出於熱心禁酒事業者意想之外。挹芬思景君

Ivan Zhilkin 就斯問題於俄京維立愛怒報 Vestnik Europa 宣言曰。俄國人民。今之振興。滿足。可謂達於極點。舊時沈緬於酒。淫佚喧嘩。好事爭鬪之惡習。今悉掃除。工場商店。安靜營業。家庭生活。趨於節儉。俄國社會。前日所受嗜酒之影響。今悉改良矣。

現當於俄國禁酒以來。社會上經濟上所生之變態。更爲敘述。其記述多自俄國月報擇錄。其報概非禁酒機關所設。故其記載甚確實。純正。羅課怒夫 Russkoe Slovo 報載斐突卡 Vialka 電信云。酒禁既申。強搶之事。銳減。警局無復有拘留醉漢之事。星期佳日。醉人滋鬧。事情亦全不見。西伯斯克 Simbersk 通信云。禁酒以來。犯罪之事。減至半數。搶奪之事。十去其九。法廷警局。竟日清閑。瓦怒奈 Voronezh 通信云。七月上。浣酒肆營業。殺人越貨等重案。達二十有七。八月上。浣酒肆停業。此項重案。僅有八件耳。克

梯立怒達 Ekaterinodar 通信云。禁酒後。犯罪十減其九。搶奪之風。全息。全城安寧。其他記載。各地所陳

酒禁成效如犯罪減少。縱火圖賠之事減少。人民家計漸趨充裕。納稅及時。商情活潑等項。其數極繁。實難備載。然就上陳數項觀之。俄國酒禁及於社會上。經濟上之成效。亦可窺見一斑矣。

更有進者。酒禁一舉對於戰事尚著有重大之成效。是固非明於俄國戰史者不能明。悉俄國軍人嗜酒最甚。俄土之役。曾有畫工將俄軍參謀部之酣飲情狀繪爲圖畫者。俄日之戰。苦魯巴金 *Kurotskin* 大將所領駐在滿洲之軍隊。於遼陽一戰之前夕。有高級軍官十數人環坐酣飲。迄於沈醉。東方既白。兩軍相見。俄軍軍官暢飲之餘。醉眼矇矓。日軍士官則鎮定清醒。慎守方略。督率士卒。於是俄軍乃大敗。此十餘軍官乃同時畢命於戰場。吁。其事可戒。其情亦可悲矣。今者俄軍幕中已不復見有酒具。而今日俄軍與德戰。與奧戰。戰鬪之力皆較昔日強甚。此豈無故哉。

酒禁既申。釀酒營業全然破壞。勞動家之受其影響者。何可勝計。彼等對於酒禁之意見。爲何如耶。以正當眼光觀察之。彼等因全國思想潮流所激。固亦以恬靜態度樂贊其成。俄波奈克公爵 *Prince Obolenski* 大釀酒廠主也。嘗於勒期 *Reith* 報宣言曰。酒禁之行。雖於吾曹至爲不利。然犧牲一切以權迎此舉之成功者。亦吾曹釀酒者之義務也。若干日前。釀酒者曾集會於明克 *Minsk* 決議承認酒禁。但要求政府許其釀造酒精供藝術上之用。更請與以助力。推其用於機械。且許其自由發賣。以供民家燃燒之需。麥酒製造廠則建議申請政府豁免其專利稅。助其推廣酒精之用途。賠償其因酒禁而生之損失。彼

等對於酒禁卽行遵從。觀此可知業釀酒者對於酒禁意旨之和平矣。

俄皇尼古拉司第二 Nicholas II 緣何於酒禁熱忱至此。知者甚鮮。據俄人言。俄皇前年自克里米 Crimea 回變時。曾微行巡視若干村野。見夫民生之困苦。風紀之頹敗。關係於嗜酒者甚多。因大感動。曾向度支大臣罷克 Bark 表示其經歷。并聲言『麥酒專賣之進步。與人民精神及經濟之毀敗。相爲表裏。嗣且與新度支大臣籌議。及於限制麥酒專賣。而另籌收入之源。』與國家之財富。國民之生產力。兩無所損者。』迨至戰事既興。人民請願禁酒者。既益衆多。俄皇乃降麥酒專賣永不規復之宣諭。且於交戰期內。并含有酒精至少之啤酒亦禁止發賣焉。

俄國酒禁未來之現象如何。誠難預言。麥酒專賣之決然停止。已成事實。所不可知者。戰事既息。政府或仍許人民之私售他項酒液耳。設其結果若是。誠爲可悲。俄羅斯現時。蓋遇有空前絕對之機會。足以蕩除酒害。俄民現在戰時。既熟知酒禁之效果。引續常行其禁令。正其會耳。願俄國現時之酒禁。洵足使歐人驚駭。俄羅斯人昔嘗被呼『野蠻人』。『半開化人』。而是之一舉。則尤爲世界之先覺人類之模範也。若干日前。俄京某熱心社會學者。見酒禁之效果。戰爭之勇猛。因而感觸。宣言曰『吾人當樹威廉第二 Wilhelm II 紀念之碑。以酬其對於俄人之功。』斯言爲熱狂之喻言。望而可知。願此次戰爭。可以變遷俄民生活之狀況。斯固俄國社會改進學者之所信也。藉使俄皇於戰事之後。永禁酒液之發賣。檢束各

部官吏予人民以民生上政治上平等之權承認民權主義之精神則此戰事之有功於俄人者庸可計歟。惟俄皇尼古拉司前曾數有此機會均以懦弱疑慮不克實行則其未來之意見如何仍難預測斯爲可惜耳。

英國治印問題 (續)

莫安仁述 徐惟岱譯

第十章 政治

先是政府遇有建議雖不殫竭煩勞然凡創一事立一法如水利路政等等印人靡不反對之以爲勞民傷財於時事無裨於大局無補也今則不但以爲不勞民且以爲國利民福之要圖矣不但以爲不傷財且以爲國富民強之至計矣以種種排擊之手段忽易而爲種種膜拜之真誠喜笑相形頗自稱慶誠印度前途之太平也惟今日尙有一事足以惹起人民之抵抗而爲輿論所不平者則莫若擴張軍備增多兵額一條文是已殊不知此實爲維持印度秩序保護印度治安計非政府之虛糜帑項故自英人簡單之詞答覆之而印人當亦可以悅然矣蓋印人向好吹求遇事無一定理由而反對之心恆覺不免惟回教佛敎巴西教諸人民則對於軍用費一項頗以英人能保障地方造福百姓故絕對服從至今實無二心其英人意中亦毫無成見種種求治惟以力圖進化爲要故印度人民感情尤極真摯如慈母之於嬰兒且謂政府對於印人亦亟盼其克有自立之一日惜程度尙未到時機尙未至我儕英人何能忍置弗

顧以拂天心而取人禍。此亦可見英人仁厚之一斑。雖印度現在尙未立憲。然英人治印無非以公理相優待。並不稍加苛虐。則雖不立憲。固亦無異立憲也。

惟尙有一事。不知英人將來能否達此目的而已。近有多數明達之士。一再陳說。擬乞英廷特簡貴族員一。永遠爲印度留守。免致時行更調。且較總督爲美。其說甚善。惟不知能否達此目的。聞上年英人已提議及矣。

第十一章 交際

外界之交際。非太過卽不及。故必求一適中。至正之理。使有利而無弊。方爲盡善盡美。說者謂印人與外人之交際。門戶過分殊有未便。顧亦有人謂門戶之見。誠所難免。惟前或失之太過而已。印度總督與印軍統領某故特互商取締之法。令印人稍知儆惕。改變方針焉。除波斯人外。凡外人之在印者。惟許商界與有往來。而其他社會交際上。則概行阻止。但遇有大慶祝大宴會等等。其本國土酋及政界人物。必須一往親蒞致敬。而躬參典禮者。則不在是例。其總督或英國貴族巡行游獵所至。則自土酋以迄地方有司。亦當以禮接待之。舍此以外。印度並無所謂交際。不但無交際。而兩方面乃均極冷淡。均極疏闊。如柄鑿之不相入。冰炭之不相容矣。試觀英國商團設有一印人廁足其間。英人卽羞與爲伍。相率不入此團矣。至英國軍士亦均鄙棄印人。輕視印人。恆以非禮相侵。非義相辱。而印人控之於官。則英官又不欲問。

其事。并不敢定其罪。若欲定之。則必爲歐洲各國人所攻擊。所非難矣。此不獨官界如是。卽商界亦然。中央政府知其然也。故僅責備官界。而不責備商界。蓋以英國官界對待貧民。雖各有憐憫之心。而侮慢在所不免也。故婆羅門教人謂英官對待印人。殊覺過於倨傲。使人難堪。雖教我以語言。擴我以理想。望我不爲不厚。期我不爲不殷。願與吾人相周旋。相晉接。當以朋友一律待遇。不圖倨傲之一。至於斯。又有某印人謂我以平等待彼。彼不以平等待我。是爲不公。又爲不恕云云。此關於印人一方面之言也。而關於英人一方面。則大有不以爲然也。按英人嘗言英印之往來。此交際上事。非我輩英人之咎。而實印人之咎。考其原因。不過由於英印兩國規則不同。體制各異。不能同室而居。同席而食而已。如遇總督巡行所之。各土酋或設宴。而主人以宗教相殊。嗜欲不通。故卒不臨席。其尙何以酬酢賓朋。而折衝樽俎哉。至於軍士反對印人。一層亦屬咎由自取。土人鄉獵獸。鄉人少見多怪。輒行殺害。以致彼此結仇不解。無可調和。此固報施之常。但當責己。何暇尤人。又如印度某法官宴客。客去卽延婆羅門教神父。被除其屋。潔治其居。而我英人則父子夫婦。均得同席。印人乃相反。不特我英國男子拒不見。卽我英國婦女進謁。其家婦女亦率以閉門相拒。其規則如此。其體制如此。大都近人情。不諳世故。更何交際之可言。故其咎在彼。而不在我。英人方面之言如此。不但此也。英國軍官對於印度軍士。均有體貼周至之心。每與之同甘苦。分患難。其或具有軍事學識。武士精神。而能鞠躬盡瘁者。則非惟破格獎勵。優異之。且往往視爲手

足倚爲心腹。以儲干城之選焉。此本文明各國待遇軍士之熱誠。英官故亦如此。如一軍員偶罹疾病。其上級長官與下級各官及將士弁勇。朝夕必均行坐不離。以示親愛。雖值軍隊當召集時期。下級官應服從上級官之命令。下既一致服從。上亦似頓形高抗。幾有雲泥睽隔之勢。而平時聚處則卽視之如家人父子矣。印度則陞級所拘。不但貴族男子不與平民往來。卽其貴族婦女亦不肯與平民婦女往來。以視英人之男女平等者。直不啻天壤之隔。是故印人與各國人雖間有往來形跡。旣難消融。而氣誼輒不能與之浹洽。姑弗論其男子之交際如何。卽以婦女之交際言之。可以概見。蓋印度不特貴族婦女不肯與平民婦女往來。卽貴族與貴族婦女亦不易一見者。今設有一英國貴婦於此。以事進謁印度貴婦。印婦之夫倘不在側。尙可萬一相值。則其婦斷不許與他婦同坐。惟立談數語而已。蓋印度土酋以及世家閥族。往往將其婦女鎖閉。不令與人往來。故雖有以英國親貴命婦之尊。曾有不能一見者。其夫惟以不諳言語禮文等浮詞爲推諉計。實則有意鎖閉而已。種種禁錮。遑言交際乎。

顧不特英印兩國交際之難。卽印度一國中之交際亦有難焉者。如回教波斯教各族。平時往來甚少。此爲印度社會上習慣之風俗。予亦無庸縷述。惟交際一事。本非易易。且亦有謂無甚大用者。故均不甚研究。况以英印兩方面之人才而言。交際則其事實有更難者。就英人對於印人一方面而論。凡二三有識之士。恆謂印度無文化。無科學。實不足與之交際。卽與交際亦復何謂之舉動。就印人對於英人一方面

而論則英人之在印者。無論官商各界均屬忙迫。異常或治文書或理會計。大抵各盡本分而行。日則操作。夜則休息。本無交際之餘力。與交際之暇。曷且印人與英人交際之心。素極冷淡。而兩方面又不願互相聯絡。互相溝通。彼既不喜。此亦不樂。就彼此皆無可如何之事故。交際更覺爲難也。（未完）

改良社會策（續）

衡德森 鍾春暉

雖然余尙有一言相告。吾以上所論者。理想也。非言此種理想。於一般國民心中。及一切公同團體內。業已得佔優勢也。噫。匪特未得優勢。且去優勢尙遠。例已往。測將來。達到目的之期。尙迢迢不知所屆。譬之高山。易見而不易。卽卽矣。亦不易攀。吾黨之抱社會宏願者。深知人心之微。道心之危。不惟不贊其成。且有加之反對者。也有利己之魔力。生無明之業障者。不知民瘼民艱。爲何物也。

然而吾黨之理想。非空幻不可行也。觀其已發之權力。已成之功德。則覺厚望可期。事之前爲萬不可能者。今則合羣智羣力而竟能之矣。統計之表者。記志向也。非記命運也。則萬餘年愚昧私吝之遺傳性。將一旦撕破。回顧祖若宗所爲者。必如噩夢大覺也。

是故吾且將西人之志向。言其一二。至於事實。則能自言之。毋庸多贅。惟志之所向爲善。而行有失敗者。則吾自言之。亦可以自責。志之所向爲善。由是而行之。亦爲善。則吾自言之。亦可以自勵。蓋其志則固無不善也。白郎寧 Mrs. E. B. Browning 之世界祖國詩有曰。希臘猶太。不復惱害。德法英俄。兩儀同泰。混

一全球。片旛靄靄。人道光華。仁漿霖霈。此則吾西人之志願。亦經所云上帝國即在人間之意也。

仁讓之風。本由一家一姓而起。譬之嘉葩異草。方在萌蘖時代。霜雪最易損壞。必置暖室中。方可保其生存。仁讓亦如是。必俟其根深蒂固。充足同化之力。而後始可移植原壤。而能自生自長。今人所謂之愛國保種者。即此一家一姓之仁讓也。蘇格蘭人則甚愛其嵯峨山嶺。紅紫薔薇。荷蘭人則夢見河水瀾瀾。風車靡靡。瑞士人則誇布蘭克 Mont Blanc 峯高入雲。鐘福羅 Jungfrau 山恆戴雪。而吾美人則歌曰。泉石流霞兮。吾愛吾家。山林潑墨兮。吾愛吾國。夫此愛國保種之心。雖小。然不可輕棄之也。不敬愛父母者。非善良之國民。通賊賣國者。非榮譽之世界主義家也。惟得人道之大精意者。則不以外人爲天然仇敵。視國際競爭爲小知小見。急宜開拓者也。

世界仁讓者。吾教之旨也。維我上帝衷降下民。此則吾黨之所信仰也。自茲以前。各國人民之政治結合。皆從戰爭而來。以有戰爭。小國併爲大國。此種結合。雖非吾黨所贊成。然於人類進化。頗有關係。羅馬戰勝天下。以其能平定天下也。惟今茲以後。各國人民。當致力於道德之結合。道德之結合者。天下興仁興讓之謂也。

第二章 論救賑之良法

社會政策之發生。根於慈善之舉也。故恤瘼求寧爲當務之急。今夫廢疾愚癩之人。色身之根器雖殘缺。

無用。其法身之神聖仍渾然同具。世人不知多抱疎忽廢棄主義。卽此一端。已見經濟法律風俗之窳敗也。乃若作奸犯科者。政府視之勝於貧弱之徒。蓋雖奸險可畏。然化馴有道。仍可變朽木爲良才。至於狂癩殘疾愚戇癡瘋之輩。爲政者則曰去其人。社會或可輕擔負。速其死。若輩亦可少慘苦。噫。是誠不知人道爲何物者也。

時至今日。泰西各國政府。匪特無此殘暴之理想。且歲費金錢萬萬。以救賑此疲癯殘疾之人。吾美各洲之預算。多以病院養濟院學堂監獄等費爲首要。仁人善婦。願犧牲生命財產。爲若輩伴侶師友者。指不勝屈也。何則。生命至尊貴也。靈魂至神聖也。最卑微之靈魂。幽閉於最殘破之身體者。與上帝之神。均有密切之關係。吾人輕之。卽所以自輕。賤之。卽所以自賤。可不慎乎。

或曰。聚所有疲癯殘廢之人。死之以迷藥。其死又不覺痛苦。於若輩既可免人世之困厄。於社會又可省種種慈善經費。一舉兩得。有何不可。而吾黨不乃爾者。何也。不爲也。亦不能也。何則。道德之命令止之。仁義之策勵禁之。夫所謂道德之命令。仁義之策勵者。吾人之天良是也。天良未死。毒手卽舉。亦不敢下矣。蠻野之世。人民無此種感觸。二千年前。希臘羅馬。日耳曼。各國之人。凡幼而殘弱者。耄而無齒者。均致之死。幾無怵惕惻隱之心。此非以其全無憐愛之念也。實因生存之競爭。戰鬥之凶猛。護衛之艱難。激之脫離此項擔負。以免牽累。且衣食僅足以供壯盛。無有贏餘。可以奉養不能生產之人也。

惟至今日歐美各國。匪特於養老慈幼加之意。且能推恩至於禽獸。路傍設置水槽。以飲牲畜。公園羅致禽獸。以遂孳生。馴養調良。毫無驚駭之狀。樹上懸挂筐筥。以資飛鳥營巢。諸如此類。不可殫述。猶太之十誡。吾教道德的法律之一部分也。中有人畜同得聖日安息之命。今國家不但有保護工人法律。且有禁止虐待牲畜之文。家庭學校教堂內。均以萬物一體。天下一家之義。授童少。特設獸醫學堂。講授禽獸下生療治之術。聖法蘭西斯 St. Francis 大慈善會之發起人也。自稱爲鳥雀良儔。通曉鳥語。閱其傳略。並其著述。大可鼓勵吾輩生胞民與物之心也。

惻隱之心人皆有之。阻抑之既有所不能。則惟有本試驗之所得。尋求格致妙術。爲人非人增幸福也。佗音卑曰。變慈善爲格致。乃現今世界之最大問題也。昔人以爲裸者解衣。衣之飢者推食。食之。慈善之心起。以慈善之行止之。亦以可矣。惟吾黨所見。則非單簡如此。蓋事必探本窮源而後可。

(一) 社會難免有罷癯煢獨之人。幼幼老老之事。人皆知之。吾茲不贅。至於幼而無父。與老而無子者。社會須籌善法。藉資救賑。蓋幼者無父何怙。無母何恃。老者煢煢無依。淹蹇頹唐。筋力就衰。難以自食。而此弱質孱軀。轉眼卽填溝壑。若不加以援手。則禽獸之不如。乃若疲癯廢疾。愚魯狂癡。尤宜撫卹。何則。人之所以遭此困厄者。均社會組織不善之所致。禍患之來。皆由不知先事預防之故也。

(二) 慈愛之心。由來古而且遍。今夫人道之賴以維持者。慈愛是也。慈愛之心。雖高等動物亦有之。天

演家言其故曰。慈幼愛赤。始由保存種族之心而生。繼乃推類擴充。緣所愛而及所不愛。善推則善羣。由是善羣者昌。而不善羣者亡。曠觀斯世。好善之人。無國蔑有。而倫理宗教均以之爲莫大功德也。

吾教於慈善範圍。推廣尤大。打破種族之界限。感通神靈之情性。賴法界之威力。及信仰之神威。勸告世人曰。凡天下疲癯殘疾。鰥寡孤獨。皆吾兄弟之顛連無告者。宜於時保之也。

基督教國慈善事業。所經之天演。有三大時期。一自耶穌升天起。至君士但丁 Constantine 止。爲第一時期。當羅馬皇帝迫虐教會時。慈善事業。均由地方教會自行組織。管理權屬諸教督牧師。其款多由聖日禮拜及領受聖餐時。所捐集。此外仍有公益喜慶捐各名目。集腋成裘。用拯無告也。二自紀元三一二年起。至一五一七年止。爲第二時期。於此時期內。教會得政府之資助。信士之捐輸。經費非常充足。由是廣築寺院。以聚僧侶。建立善堂病院。以惠行旅病人。且行道設教。遠及北歐。化其蠻野。漸進文明。此種善堂之產業。至今猶存。造福人類。誠非淺鮮。龍斐羅 Longfellow 過古寺詩。可爲中世紀之寫真。蓋遍歐洲庵寺之門。均嗷嗷待哺之貧民也。其詩曰。塗回道塞。貧民如鯽。鐵檻錚錚。目光惻惻。骨立如柴。容生菜色。附耳垣邊。竊窺門側。鍵門閑闔。革靴得得。施主無情。蒼天不德。常遇糧絕。命懸頃刻。三自十六世紀至今。日爲一時期。此期特別之點。卽政府漸以恤患救災爲責。畧有懷保撫綏之政。是也。教會千餘年所傳所爲。博愛之道。政府頗有倣效而行。而北歐北美諸國。遂有救貧之律發見矣。此種變易亦大有故。何則。行乞當禁也。教會無此權力而爲之。濟貧稅當行也。非政府定律使富戶同擔義務。勢有未能。乃至於狂癩廢疾。非政府禁止其自由。則尤非私人團體所能干涉。且此種政權。亦不能付之他種機關而代行之也。

傳記類

李司特耳傳略 (續第五號)

莫安仁 哈筱泉

總之李氏效偉雖久年棘手之證今以新法治之實能措置裕如且李氏無驕矜之色一概以溫柔處之雖力任其難而對於助手仍不出急遽之言其研究之苦心以及接物之德行使人尊重而感激至學醫之青年學力不足以赴之而李氏面帶色笑俾無滋愧可見優勝之處不但在於敏捷與幹材實人格高尚之所致苟不知體恤病人之痛苦其功即不造於精深李氏以力助人羣爲志因其智識故恃己多而恃人少惟有智識而不誇超邁於人之程度而不傲舉一切刻覈待人反覆無常之弊均一洗而空每日治事面容純和無一可怒之事且知人行一事專恃天命立定主義不得隨意更張且李氏對待僕役或求診之病人皆極形溫厚雖然至於診病係代人謀立言不稍假借苟有不合則力斥之此係求病人之速愈與學生之進步及自己之慰樂也後有衡利大文學家因病而慕李氏以詩頌之

瞻彼濃眉 維溫維和 瞻彼明眸 炯炯秋波 沈默寡笑 寂兮靜兮 肅兮嘉兮

有斐君子 誠可嘉兮

瞻彼儀容 具有深思 瞻彼偉範 包孕仁慈 遇物以誠 侈兮恥兮 肅兮嘉兮

有斐君子 誠可嘉兮

維彼嫉妒 百計探窺 維彼愚頑 欲遠則推 君子無辜 忍兮毅兮 柔兮嘉兮

有斐君子 誠可嘉兮

維彼微笑 曰智曰聰 維彼問疾 以愛以忠 伊誰制之 懿兮毅兮 肅兮嘉兮

有斐君子 誠可嘉兮

維彼醫術 和緩相同 維彼興戎 戰勝俗風 疾苦不公 如上帝兮 死亡殄兮

有斐君子 誠可嘉兮

第八章 正論之傳播

王調生

格致之學爲人類所重視與宗教同。雖反對辯駁之說所不能免。然信仰者之贈金。專門家之提倡。頗足致其學於發達。大抵學術之發明。首恃熟練而不可純任乎聰敏。惟腦力敏銳之偉人。專心致力於學術。其發明者恆較常人爲多耳。人第見專門大家所論述者未必盡屬高深。遂疑專門家之所研究無殊常人。而不知學術以用世爲要。故雖淺微之理亦當致力發揮。以資應用。苟專門大家所論述攻究者皆高深之理。常人所不可知。所不可行。則子立無援。陽春和寡。學術亦何補於世歟。李氏之於醫學。於普通問題一例重視。務使世人明瞭。而後已。宜其得有多助。以致成功也。

當是時李氏所注意者是爲細菌。李氏知細菌之發生最易。病院尤然。苟入人身皮膚之創傷處。卽足致

人於病治之之藥首推炭酸細菌。苟遇炭酸即可消滅。不然亦決不足爲害。故其目的首在杜細菌之發生。最注意於病室之空氣。醫生之手指。外科器械。病人之腐肉等。以防杜細菌之傳播。而遇有創傷之處。細菌已發生者。則概以炭酸水治之。以殺其勢力。絕其根株。醫界經此發明而病者受細菌之毒者。賴以救濟矣。

李氏對此發明。正思引申論證。使人明晰。以宏其效。而當時南舍特報。乃大與以助力。斯報爲邵母奧克奈。Thomas Wakeley 父子所編輯。專攻倫敦醫士之鋼弊。其子苦母戈期奧克奈。James Goodchild Wakeley 尤服膺李氏之說。爲之鼓吹。論當時醫家之頑痼。李氏發明炭酸防止血毒之成效。并歷舉當時醫院因結續斷骨。鋸斷手足。割取膀胱。癩石。致血毒發生。喪人性命之慘酷。以爲李氏新法於人類幸福。大有所關。有此提倡。而世之信任李氏之說者。乃益衆矣。

關於防止血毒之事。次李氏而爲之研究者。是爲李氏同時之人。苦母新迫省。James Simpson 特李氏所發明之法。爲浸以炭酸。束以縛帶。而新迫省則主張以貫針止血之法。治之。其功效不逮李氏耳。新氏於醫界痼習之難革。亦所深知。蓋彼曾於麻藥之麻醉力有所發明。因之大受時人之攻擊。雖竭力辯論。而外來之毀謗。竟難免除。卽其主張之貫針止血法。亦有以襲用陳法。據爲己功。譏之者焉。

新迫省於醫學。雖有所發明。然不足與李司特耳及大運 Darwin 等儕列。而爲專門大家。蓋偉大之人。

物見解固當高尙度量尤應寬宏猜忌之心斷不當存新氏見李氏於改良醫院制度防止血毒方法歲有所發明心知其爲己之勁敵初雖未加誹謗其後終於南舍特報發表其抨擊李氏之議論謂炭酸藥劑之用不自李氏始李氏引前人之法以爲己功殊爲卑鄙又引李氏反對者黑斯脫 Hingston 之言爲之證明以爲李氏所發明之新法皆係襲用前人皮毛其度量可以想見所以謂李氏行爲之卑鄙者適形其自己之卑鄙耳

新迫省明知炭酸藥劑縛帶之法發明完善彼所主張之貫針止血法將歸無效而此貫針止血法者彼對之研究試驗將及十年一八六七年得班倫 *Denham* 醫學公會開會時曾竭力表彰其說曾幾何時竟爲李氏發明之法所超越昔年彼於麻藥之麻醉力有所發明時曾大受反對者之抨擊今對於李氏縛帶止血之法既甚忌妬於是乃思以昔之受於人者今施之於李氏遂於南舍特宣言曰既有貫針止血之法縛帶止血之法當勿復用謂用前法創傷可以縫合膿潰可以免除并引徵匹力 *Pine* 醫士之言以證明貫針止血法之效果且作終結之問語曰若是李司特耳不仿行貫針止血法於其格拉斯哥 *Glasgow* 醫院以代其不見信用炭酸之藥縛帶之法者是何故歟

李氏對此論難自不得不爲辯正其答詞簡單鎮定就柰末 *Lemaire* 醫士及自己使用炭酸劑之論證及縛帶止血之成效作答辯之根本以貫徹其主張并致函南舍特主筆云

貴報今日所載新迫省先生之論說鄙人理當答辯惟此論題鄙人曾經研究貫徹無疑若得貴報允許當將該解說送陳貴處按日登載以息衆人之疑而定是非之鵠李司特耳謹白

此簡潔之答詞既使新迫省氏無可置詞利勿浦 Liverpool 之利克得 Ricketts 醫士乃又出而反對既讚美貫針止血之法復詆李氏之新法爲前人曾發明而棄置不用者其言曰今世之人既得有簡明優美之貫針止血法知其有宏大之效果而仍與他之陳腐之法以信用者吾誠不知其何心閱一月復有兩外科醫士出而左袒李氏僉謂從彼之經驗炭酸劑之用確有偉大之成效并宣言如新迫省能舉出某外科醫用貫針止血之法較諸用李氏新法有同一或優勝之效果者彼等即移其信用李氏之心而信用新迫省斯言既經公布於是新氏乃無攻擊李氏之餘地今者觀新氏對於李氏新法之非難徒見其度量之狹然在當時固嘗發生一效果其效果維何即激動名外科醫士苦母腮母氏 James Syme 使對於傷害李氏之信用者爲憤激之譏評是也

李氏新法既經發明之一年後反對者漸減而新法成效感動社會之力亦伴之而形退化顧蘇格蘭愛爾蘭等處仍不乏讚美稱道李氏新法者凡茲之人各就其自己考察所得證明李氏新法之成效就以名外科醫士而贊同李氏之法者即利勿浦皇家醫院之畢克爾梯斯君 Mr. Bickersteth 彼謂李氏防止血毒之新法乃醫學改良上之一進步也

他之提出重要證據證明李氏新法之良善者爲克利斯威爾 Cresswell 氏威爾士之著名外科醫也。嘗以多賴鐵器舊法 Dowlais Iron Works 治病八千五百名而常少不幸之事氏既習李氏之法因用以治病人歷十二月乃宣言曰用炭酸治創傷折骨之症是爲對於多賴鐵器舊法之大改良余行其法十有二月施之於常見之各症蓋莫不現偉大之效果焉是之證言乃又致起奧克奈君之疑難氏對於倫敦一地不信用李氏之法頗爲懷疑因宣言曰克利斯威爾君外科之經驗甚富彼言用炭酸治創傷之症乃多賴外科手術上之大改良願李司特耳君之法乃不見用於倫敦豈血肉膿潰之現象在格拉斯哥暨多賴者與此處相異歟抑此間用李氏之防止血毒法者未能仿行盡善遂無效果歟李氏之法在蘇格蘭愛爾蘭等處醫士雖多探行願獨不能見客於倫敦蓋倫敦醫士位置自高自恃之心既強同化之力斯弱降己從人決無其事故對於李氏之法非難阻礙之事直沿至李氏至倫敦執行事務之時後章當爲載明當是時倫敦外科醫士與李氏交換知識研究新法者僅大學病院中卑爾克奈赫 Berkeley Hill 一人氏識量寬大不爲地方習尚所囿不爲世俗誹毀所動嘗與李氏研究新法之精理且嘗親至格拉斯哥考察李氏之成法與效果一八六九年一月氏見倫敦外科醫士於李氏之法不見採行乃對衆爲勇敢之宣言曰倫敦醫界對於防止血毒一事失敗之原即在不能竭其思慮設防止血毒之法如李氏耳今欲攻擊李氏之法必發明一法較善於李氏方可計不及此徒固守舊法豈計之得哉氏之言雖正當然倫敦人士莫之信也

(未完)

宗教類

基督誠命 (續)

莫安仁

至於罪孽一項則尤爲信教者哀慟所存自己之言行倘有不善致違上帝之命令因爲己心所深憂卽在世。人。凡。有。罪。孽。皆。不。勝。哀。慟。之。心。信。教。者。之。心。志。極。願。舉。世。之。人。悉。從。天。國。之。道。理。世。界。之。內。悉。爲。宗。教。所。感。化。道。德。昌。明。障。礙。悉。去。然。後。乃。能。減。少。哀。慟。之。心。藉。非。然。者。則。一。夫。不。獲。時。予。之。辜。悲。天。命。而。憫。人。窮。救。世。之。心。蓋。無。日。釋。然。矣。所。謂。哀。慟。有。福。者。義。如。此。

第三謂「溫柔者必有福」溫柔之人常爲庸俗所輕視謂其不圖自強不計利害柔懦退讓未足辦事殊不知基督尊重之溫柔與庸俗所稱不同溫柔者有異人之器量過人之膽畧英之戈登將軍世所稱威武勇毅之英雄也而其依從基督恪守教旨溫文爾雅乃一著名溫柔之人可知溫柔無害於事矣溫柔於人可以化一時之意氣可以鎮不正之野心人而溫柔則受人侮辱秉三反之戒笑橫逆之非平心靜氣不與計較謂其非禮之加非害個人乃害公道彼害公道於我何與烏乎器量如是其人之幸福爲何如也庸俗之人暴戾恣睢睚眦之怨報於瞬息驕傲之氣誇大之言於人不知讓於己不知反逞強一時自鳴得意然爭勝片刻失敗千秋試觀小而個人大而一國稱雄圖霸惟務勝人其能長久興盛者有幾人也溫柔之人不然其志靜其氣平順道而行和親寬厚化斯世之乖氣歷久遠而長安所謂溫柔

有。福。者。義。如。此。

第。四。謂。『羨。慕。仁。義。者。必。有。福。』解。釋。羨。慕。之。意。義。應。從。廣。義。世。有。以。辟。穀。素。食。爲。入。道。之。門。者。吾。人。見。之。亦。不。能。議。其。不。是。惟。基。督。所。言。『羨。慕。仁。義。』則。非。徒。辟。穀。素。食。之。謂。基。督。之。言。曰。『人。飢。而。思。食。渴。而。思。飲。應。知。求。福。在。思。羨。慕。仁。義。』仁。義。者。人。生。須。臾。不。可。無。之。者。也。人。知。羨。慕。仁。義。則。心。志。純。正。自。與。庸。俗。不。同。所。謂。羨。慕。仁。義。有。福。者。義。如。此。

第。五。謂。『仁。慈。者。必。有。福。』路。加。福。音。第。六。章。第。三。十。六。節。之。言。曰。『爾。等。之。仁。慈。應。與。天。父。之。仁。慈。同。』上。帝。之。仁。慈。與。庸。俗。異。者。庸。俗。之。仁。慈。煦。煦。之。仁。婦。人。之。仁。救。人。也。或。且。誤。人。所。謂。非。徒。無。益。而。又。害。之。是。也。上。帝。之。仁。慈。不。然。至。公。無。私。除。暴。安。良。不。顧。此。而。失。彼。不。視。假。以。作。真。慈。祥。愷。悌。實。德。及。民。例。如。庸。俗。之。人。見。道。旁。乞。丐。惻。然。振。救。殊。不。知。偶。遇。乞。丐。於。目。而。天。下。困。苦。之。人。十。百。於。乞。丐。而。未。察。見。者。未。知。若。干。務。其。小。者。而。遺。大。者。安。得。爲。真。仁。慈。也。基。督。教。人。講。根。本。務。久。遠。博。施。普。濟。一。視。同。仁。則。仁。慈。之。心。自。與。上。帝。相。合。所。謂。仁。慈。有。福。者。義。如。此。

第。六。謂。『清。心。者。必。有。福。』講。清。心。者。有。以。清。靜。歸。之。於。身。如。謂。目。不。覩。惡。色。耳。不。聽。惡。聲。是。也。基。督。之。言。更。深。於。此。惡。色。不。可。視。惡。聲。不。可。聞。而。不。善。之。念。尤。不。可。存。之。於。心。不。但。心。不。存。惡。念。尤。須。使。心。中。之。惡。念。無。由。而。起。庸。俗。之。人。物。慾。蒙。蔽。思。想。不。正。皆。以。先。有。不。正。之。念。蘊。蓄。於。心。故。欲。清。靜。而。不。可。得。耳。依。

從上帝之人緝熙光明清靜純一故其心境日離庸俗而與上帝相近所謂清心有福者義如此

第七謂「勸人和睦者必有福」此義中國人知者極多存心忠厚希望和親觀夫橫暴之人動輒爭鬪好戰之國時興干戈以及兄弟之鬩牆婦姑之勃谿常不勝痛惜不忍之心不願其事見於目聞於耳人心若此則無愧上帝教旨世界之中人人如是則擾亂治安之事無自而起和睦者誠道理中之極要者也吾人誦讀福音聞基督所言「上帝願人與之和睦」可知勸人和睦爲教旨中重要之事庸俗之人欲脫昏瞶而見光明去乖謬而近端正皆非依從上帝和睦之旨不可基督宣明此義引人克至天國與上帝相接近是以人能躬行實踐和睦有常則上帝之真意卽能洞悉於心矣庸俗之人或謂勸人和睦勸個人易勸世界難殊不知基督之意旣以勸人爲宗旨則苦口良心初非寂默無爲之徒所能勝任社會中不仁不義之事指不勝數基督教人矢發宏願將和睦之義輸入人人腦中使世界各國皆依上帝教旨化競爭爲平易儕斯民於大同極樂之天苟非其人勇敢有爲曷以臻此所謂勸人和睦有福者義如此

第八謂「爲義受累者必有福」其義明顯茲不贅釋

總之吾人就八福之意義精心研究則於基督所定之「完全人格」已可悟其概略庸俗之人品評人類若名譽若境遇若地位若才略以及男女老幼種種區別舉不足爲完全人格之標準彼種種者所謂

表面形式不足爲立身之根本。完全人格者立於根本，非浮於表面者也。不問形式之奚若，祇冀心志之純正，名譽境遇才略地位皆爲根本。資格之外附加條件與心志之向道無絲毫關係也。

心志向道所以爲立身根本者，何曰崇奉上帝，恪遵教旨而已。人能誠心奉教，則無驕傲之氣，誇大之言，不倚勢以凌人，不恃強而侮衆，持躬端正，秉性謙和，憂人憂樂，人樂諒人，助人無愧，完全人格，卽無愧天父之子女矣。庸俗之人或以完全人格艱難困苦，成功不易，不知誠心向道之人，其境困難，其意祥和，外或憂愁，實則安樂，人而依從上帝，則德惠及民，成功世界，希望得遂，幸福無窮，更安有艱苦之足言哉。

人格完全之人，約束身心，須臾不懈，以罪惡爲大敵，以匿怨爲巨恥，橫逆之至，恕而不校，其所以爲成功之基礎者，不尙強暴，不務豪放，惟在固其志，專其意，堅忍無變，誠信無欺，生平以成德明道爲宗旨。世有君子，有賢良之士，尊之重之，願與交接，至見卑鄙無賴之徒，則痛惜憐憫，竭誠化誘，盡力拯救，冀其覺悟，悔改脫罪孽，而離地獄，故人格完全之人，存心濟世，拯救困苦，其計畫周密，其設施完備，較之庸俗之人，救人而誤人者，其利害得失，不可以道里計。至公至平，不偏不倚，不獨改良其生活，且於生活之外，定根本之計畫，爲適宜之感化，俾世界之人悉聞大道，而與上帝接近。苟非人格完全之人，烏足臻此。

人格完全者，志在以德化人，使社會之人遵從教旨，不致舍本逐末，其自己向道之心，亦復如是。專心致志，不忘本務，其言行爲上帝所嘉許，其心日與上帝相往來，舉措動作悉體上帝之旨意，以定行止，心氣

和平。故其所至。吉祥。人有芥蒂。得其解釋。卽歸和洽。烏乎。崇奉基督。人格完全之人。幸福之宏。蓋如此矣。庸俗之人。亦有謂人格完全。半屬虛僞。未足深信者。是不啻以盜跖。議夷。齊吹毛。求疵。詎足損人格完全者之德行耶。往古羅馬。亦多賢哲。然以基督所言。與之比較。則得上帝教訓之助力。必非往哲所能企及。凡吾人類。其依從基督。勉成人格完全之人也。

(未完)

惟四體不覺有一法與吾心之法戰。執我從四體之惡法。

羅馬七章二十三節

達爾文德教士演說
國侯邵筱翹譯文

吾人。今信罪有致人於死之實力乎。更信胡斯經 *Ruskin* 先生所謂巴夫阿打 *Puff-blower* 毒蛇尙不能使人確實致死之說乎。罪也者。非如世之所稱爲禍也。禍如意大利之地震。是其中并無罪之性質存焉。所謂罪者。係倫理之禍。根於人心。非地震比。地震者。地不負責。罪則根於人之性行而生也。沙魚噬人。稱之曰沙魚爲禍。而人亦恆變爲沙魚。吞沒其友朋。擄騙其鄰里。其所行爲罪。而非禍。固與真沙魚之吞人大異。宜負責也。夫罪有致人於死之權力。至爲可畏。較之毒蛇。尤毒。蓋蛇毒尙堪稱爲長生不死之藥也。今吾人爲二十世紀中新人物。如種種之可敬之文明之教育。豈能容此可畏之惡質存乎天性之中耶。而奧立。否拉。齊先生所謂。今人勿庸爲罪懼。此語。殆不足信。蓋罪之明瞭。有如元首冠乎。四體之上。惜大多數人不作有致人於死之事實觀耳。予環顧再三。見世人芸芸。擾擾。皆不以小罪介意。以其未於真光中見之也。倘於真光中見之。則罪將顯現。如保羅達羅馬人書中所謂。罪與心戰。執之使從四體之惡。

法斯帕諾闢意所謂罪爲消極之事。以人不欲成聖成賢。其心則別有注意。所缺者希聖希賢之心而已。其所誤者。卽保羅所謂私慾與靈魂戰是也。觀今日之戰。洋鎗也。炸彈也。開花礮也。無非殺戮殘害。卽保羅之所謂罪也。夫憎怨之心。滋長終使靈魂變爲魔鬼之靈魂。甚至使愛情感情皆被憎怨之毒所侵蝕。若謂罪無可懼。誠無意識之談。蓋戰卽實行其燬城殺人之強力。此亦保羅以之爲罪也。今於吾人中有能使棄此破壞之強力者。神力是也。設罪棄我而去。任我中立。則其爲禍不至甚烈。乃罪終不我棄。時且力增其毒害。信有致死之危矣。新約所謂不得救之人。似死於罪中。以其初不過誤入迷途。久之遂至終身陷溺。良可慨也。夫亡於罪者。如尸骸之不覺痛。蓋誤以罪不足傷人也。設有攜械之強盜。逞其凶暴。痛擊人頭。顛雖經捕獲。卒死於罪人。將見其敏於作惡也。詎知盜之亡實亡於和平之罪也。蓋罪能使靈魂聽命於魔鬼。敏於作惡。頗具可畏之權力。善導生命。誤入於投毒之泉流者也。惟罪與病之中。模稜處。吾人每爲所誤。昔基督行神蹟醫罪人與醫病者。何殊。乃吾人嘗誤論病之性質。僅爲消極之事。不知實具有敏捷惡毒之強力也。設有人焉。身患毒瘤。其致死者。卽敏捷有力之病種爲患耳。此種未能斷絕。頃刻繁生。其害遂至吞噬其身。而惡孽有積極殺人之權力。害與穢同。謊言者之靈魂爲無信所吞沒。其害較之毒蛇爲尤巨。好色之徒。不僅缺乏清德。其靈魂實與慾火激戰。終被燬滅。奢侈之人。爲貪慾之奴隸。無可疑也。吾人今當知罪之可畏。其實力足以致人於死。害較巴夫阿打與柯卜拉(Cobra)毒蛇爲尤烈。苟

輕視此可畏之權力必至身陷作其犧牲今日之戰固足表示其輕視仇敵之至愚也

詳審乎罪有何權力與人戰宜先觀其如何燬人想像夫想像賦自上帝以預兆未見之景物如約翰默示錄中所記天堂珠寶之門上帝羔羊在其中是也惟罪恆誤用此想像并從而燬之青年人復燬之以淫書淫畫此卽青年人所以被誘而去也蓋罪之燬想像也必曰於某某處有可見之生命以誘之少年人大都爲此能力所誘矣予憶前有某報專供兒童觀閱者其內容之罪惡不堪寓目而該報之背面且大書特書曰記念爾創造主此卽魔鬼爲害之好手筆其能顛倒破壞德力亦瞭如指掌是罪如病種力足害人甚可畏也夫謀食者人之常情而罪必使之成貪溺之愈深其心愈無所懼終至漠視他人權利而後已是何異集多數無心肝之貪夫嗇老其心皆爲貪婪所侵吞哉天賜人以食慾而罪竟使之成爲饕餮成爲醉漢此卽罪運動之法也若謂罪無可懼愚孰甚焉

吾人之意向卽耶穌所承認爲人類寶筏之舵乃罪能掌舵聽之將駛入礁石矣今世人皆行所欲爲雖多數均知爲誤而行事仍不服從良知與上帝之律法者比比也耶穌曾告僞善之人云稅吏與妓女當先爾入天國卽謂罪之運動於奢侈人中較貪婪并好色之運動於稅吏妓女中爲尤甚蓋稅吏妓女之爲惡警士知之登之於冊顯而易見者也而罪於男女中毀其敬虔奪其堅信使其不能祈禱皆爲警士所不知不較貪婪好色爲尤可惡乎罪有權力以行欺騙之事如稱心悅目諸名詞皆罪用以誘人者也

彼極聰穎之愚夫。每深信爲善不樂。惟美色足樂者有之。如前文所謂可見之生命者。卽生命亦有潔與不潔二方面。奈何只見其不潔一面也耶。昔使徒之遇耶穌基督亦多未見潔淨之生命。魔鬼用以迷惑亞當夏娃之妙妓。吾人至今猶不能忘也。凡與福音反對者。每無誠實之理由。近世人每辯論聖日宜否。體操。然善男信女。平時既教導於學校。今日尙不崇拜上帝。豈非自欺耶。究之罪之害。實較甚於毒蛇之毒。予於福音有最明徹之理證。予謂無流血則無赦罪。人或大恐慌。或謂尙有他法以赦罪。則予亦將甚駭異。倘罪爲懦弱之愚。則道德終足以制勝。詎道德必勝罪之說。已成畫餅。故欲從根本解決。非神力不足以驅除此卽流血之至意也。上帝子已降爲世人之子。身實無罪。曾爲罪死。更爲罪復生。其權力能藉十字架制勝罪惡。此爲吾人所確知者也。外教多以罪爲不可免。釋教則以罪有此極可畏之權力。無制勝之思想。故有脫離紅塵死樂於生之方便。是何異於因噎廢食也。耶穌嘗謂生命爲上帝所賜。而罪惡每欲毀之而去。罪與脫人於罪。信非上帝羔羊不爲功。無如世人不知罪爲巨敵。每每輕視之。上帝則使其獨生子降生世間。用全能普救衆生。此我釘於十字架上之耶穌。早已戰服罪惡之光榮也。世有欲戰勝罪惡者。幸速信從之。



雜纂門

智叢

飼犢記 (見英國農漁部發刊叢報第一百四十二篇)

閩侯邵寄園譯

飼犢之事。在犢之方面。自以就牝牛飲天然乳爲最妥。乃自近世皆以牛乳出售爲農業莫大之利益。於飼牛之常法。牝牛之乳量。可忽焉而不講乎。英國尙有任犢隨牛而乳者。然犢隨牝牛而飼。固爲佳事。惟此於暮春初夏行之。固屬易易。因斯時滿田青草。徧野蒼蒼。設於嚴冬大雪之時。恐將無以爲繼。况每犢每日應用新乳六瓜得。計價九辨士。若長此以往。恐非理財之道也。且飼牛之道。有如儲蓄。雖少用新乳。亦能令其增長肉質。獨於牡犢。雖定其最高價格。僅足抵其所用新乳之成本。其善長者亦不必多用新乳也。今英國北省人。創一新法。以飼小犢。并製有牛油與支時等。法詳於下。

犢屋

屋爲一廣大斜屋。南面略高。屋頂嵌鑲玻璃。間隔平列。以受陽光。地下以凝合之質築成。無論明溝暗溝。皆不宜有。屋有兩門。門係兩合。兩門應同在一面。俾免大風橫吹之患。其欄大縱五英尺。橫六英尺。每邊

均有中門。門有簿板隔堵。下不及地。前置欄杆。俾各犢得互相窺見也。每欄中置一槽與乾草料等。初生之犢當置之槽中。槽底鋪有寸餘厚之碎苔軟墊。上蓋草藁。若有加草之必要時。每日無妨加以少許。待至一星期。槽當整潔一次。後來只用碎苔。若更需添苔時。可以碎苔散佈上面。至三星期。槽又當整潔一次。因苔極能收溼。且能去味。致無臭味之傳佈。亦無溝道之必需。苔自槽中移出時。猶爲太乾。未足以置之肥料堆之上。若先以置肥料之傍。俾收足其溼度。然後置之於其上。則莫善如之。如此可見其臥牀舒暢乾潔。與陽光及新鮮空氣之預備。而令其互相窺見者。卽所以育其交際之靈耳。凡此等等。飼之皆非難事。蓋備有牛屋。實爲飼犢之大助也。

新犢

犢一墜地卽移置槽中。犢與牝牛皆未見有分離之悲感。飼者兩手當先用加坡勒酸油擦過 (1 part Calvert's no. 4 carbolic acid to 19 Galipolic oil) 亦當常以此油塗於牝牛乳上。以免滋生發病之穢也。今當以束草擦淨犢身。復令其躺臥槽中。上蓋以草。待至牝牛能乳之而後已。照常小犢。生後非至四足力能起立。未能就吮牝牛之乳。在溫和天氣。其首餐之飲。無妨暫緩一半小時。惟於冷天則爲莫大之緊要。溫乳之飲。以速爲妙。平常小犢所飲之乳。當以牝牛血熱爲度。(華氏表百零一至百零二度) 此卽犢就吮母乳之熱度也。乃奶自牝牛身中流出。經冷空氣入牛奶桶中。至少低降十度。故此項牛奶應加以

水少許。或用別法使溫。無論當時後來均不宜令乳太熱。與其得太熱之咎。無寧坐略涼之失也。

先以兩前指置犢口中。并以手放入奶碗中。平常小犢卽時力吮。有時略停。因其未得回復其吮吸之能力。首餐之飲。一瓜得足矣。大半小犢。只有如此飲量。亦有能多飲者。夫初奶之異於常奶者多矣。以其含有五倍膠黏質。兩倍五金質。且此膠黏質在犢之胃中。成爲蛋白質。并不凝結。自亦勿庸消化。非如在牛奶中。能成爲凝體。若加熱則凝結。故溫初乳者當加意焉。勿令其太熱也。是以新犢餐蛋之舊例。誠非必要之舉。以初奶中已含有許多蛋白質也。時有新生犢之牝牛。於犢生後一二日售之而去。或犢於生後一二日購之而來。或牝牛於生犢後病歿。小犢未能得飲初奶。際此之時。頭三日每餐破蛋一枚。鼓打之。和以半派茵溫水。加半茶瓢啤嘛油。傾入一派茵之新乳中。攪動之。五日後初乳漸轉具有常乳之性質。

飲奶規則

小犢每日飲乳三次。卽上午六時三十分。中午十二時三十分。下午五時三十分。至八星期始能自由嚼食草料。并知於饑時趨向草料桶中。若小犢日中不食。爲時太久。殊非善道。其每日應飲三次。若僅給飲兩次。則犢病矣。

犢生之第三日。飼者則不必以指助飲。可使其就小桶而飲。斯時每次兩瓜得之奶。竟如風捲殘雲片刻而罄。待兩星期有半之後。新乳始可中斷。然後每次之飲卽一瓜得之新乳。三派茵之提肥牛奶與乳皮

質等。如以下三者。其得有最美滿之結果。即

(1) 煮熟之胡麻子 以三加倫之水。泡兩磅之胡麻子。經宿至明日。煮開并攪動之。至二十分鐘。迨煮熟之前五分鐘。以半磅麪粉(前已和水俾免成丸)加入糊漿中。以制其洩瀉之性。其甜味能經多日不失。故即多備亦屬無妨。一派茵之糊漿。可加入四派茵之提肥牛乳。

(2) 磨過之胡麻子 欲先得未磨過之胡麻子者。以可信其含有全份之油質。然後以磨石磨之。(以一份印度穀粉配七份胡麻子俾無有膩磨之患) 以一加倫開水泡一瓜得之麻子粉。攪動之。此項漿糊較之熟麻子漿尤佳。於預備尤為捷易。一派茵之糊漿。可對以四派茵之提皮牛乳。時人往往以胡麻子粉製小犢漿。製法即提肥牛乳滲入胡麻子餅粉。惟以麻子餅粉製漿雖佳。然較之胡麻子則遜甚。以胡麻子富有油質。餅僅含油質百之十二。而胡麻子則含有油質百之三十六以上也。

(3) 魚肝油 魚肝油為飼犢之滋養品。其代價每加倫僅四先令六辨士而已。亦為便宜之酪漿類。和油法。先以魚肝油一大瓢傾入桶中。後將每次應須之分奶皮牛奶傾入。再將此滲合漿將別傾一桶。俾油乳相投。新犢每日可飲三大瓢。至一月或六星期後。可飲六湯瓢。雖稍多易使其有洩瀉之患。然六湯瓢之魚肝油飲已生過六星期之小犢。當無傷也。

以上三者。惟第二以開水泡胡麻子粉為最可取。其代價每石兩先令六辨士。若每星期費四辨士零。每犢之麻子粉費僅兩先令一辨士足矣。

(未完)

文苑

一誠齋詩存遺稿

上虞許傳霈竹雨

三十自述 癸酉

重桂堂前桂蔭連。執經趨對溯髫年。此身賴得之無識。累世猶羸清白傳。詎料箕裘湮手澤。遺未冠而失况經鄉里擾烽煙。頻年骨肉流離際。悵望家山淚潸然。

庭萱猶喜駐春暉。寸草相思得所依。慣住湖山聊自適。重游茗壑忘機。庚午冬奉母由杭復游湖岸家貧當恕甘旨。

奉歲晚難堪。故舊稀。淒絕黃泥岡下路。未崇馬鬣倍歎歎。先君子尚浮屠

萑苻何物肆蚩尤。兵火餘生浪迹浮。指航海遇盜事淮海濤聲驅客病。由上海到淮安金焦山色壓鄉愁。館秦山望見江上峯王

恭長物空餘。簞庾信悲秋。獨賦樓差幸。故園完聚日。龍宮何事沮歸舟。大乙丑水

生離死別每神傷。寥落年來不自遑。未起嚴敦慚馬誠。伯兄屬教幼姪欲聯軾轍悵蘇牀。仲兄在湖叔兄在嚴高情無復披

求借破硯長教。懷直方。先人有求借硯被贖伯平高丈贈有直方硯錄此取意為之坐對妻孥空寂寞。復看春草碧池塘。

梅放孤山興不孤。同人買權泛西湖。已慚南閣談經席。詰經精舍供奉叔重氏神主余肄業有年莫問高陽舊酒徒。余不別有善飲

嗜痴揮翰墨。余不作篆隸藉以攷古不意人多嗜之誰能品味到尊鱸。歸來還把圖書列。一笑先生合號迂。伯兄以手迂號余

立身誠意兩操持。先訓人遺甘苦從教心自知。切磋他山資好友。追隨魯殿得吾師。謂伯平宰平兩丈半生書劍嗟無

用。卅。載。功。名。愧。已。遲。壯。不。如。人。將。老。大。返。躬。何。以。策。良。時。

二月二十八日偕龔梓林邑宰游白雲洞在東陽城西十里

平生雅有看山癖。為訪名山徧蹤跡。此邦山勢倍巍峨。雙峴八華翠環積。甌峯之陰深復深。有洞甕然雲

滃。白。我。來。春。雨。初。霽。時。溪。水。潺。潺。亂。郊。陌。山。隈。曲。徑。畫。圖。開。正。奮。足。力。忘。休。息。忽。覺。兩。岫。排。碧。空。擘。破。玉

龍。五。千。尺。噴。雪。霏。霧。逞。奇。詭。倒。海。奔。濤。自。雄。特。白。日。渾。訝。風。雨。來。當。頭。幻。作。金。鐵。擲。清。盈。貯。成。瓊。玉。盆。玲

瓏。長。挂。珠。璣。壁。玉女盆珠璣壁皆洞中景觀水須窮水之源。千仞峯巒奮杖策。絕頂山勢復嶙峋。脚底鳴濤走霹靂。飛

瀑。竟。接。石。乳。泉。一。覈。晶。瑩。通。地。脈。偶。然。松。火。試。石。銚。虎。跑。惠。泉。不。能。敵。我。聞。有。宋。多。隱。逸。隱居於此勝手

把。漁。竿。謝。徵。辟。又。聞。明。季。張。太。傅。太傅張維養母處鑿。半。月。池。藉。游。適。遂。初。洗。得。此。心。清。尚。志。奚。為。萬。乘。易。月半

起自志敬公况是先儒讀書處。佳話堪鐫一片石。君子所重去故鄉。理學文章炳今昔。文魁出嗣金華號

何。幸。先。達。竟。萃。此。景。行。高。山。兩。樹。得。客。言。勝。地。不。虛。來。供。奉。瓣。香。藉。親。炙。否。則。雅。事。繪。東。園。終。古。名。區。開

講。席。邑人盧東園桃花半塢蒸霞紅。松老千株映嵐碧。松壘桃洞年年佳氣滿山林。涵碧翠微見顏色。碧滃

微莊我是金華後世人。已慚名氏食舊德。襍被來此或夙緣。願誅衡茅處山側。

題俞五如有酒學僊圖

人。生。不。過。數。十。年。倏。忽。韶。華。指。一。彈。富。貴。貧。賤。於。其。際。復。晞。朝。露。過。雲。煙。俞。子。胸。中。思。爛。熟。隱。居。吳。興。山

水。間。吳。興。山。水。獨。清。遠。佐。以。壺。觴。儘。合。歡。幕。廬。天。地。勢。寥。廓。黃。墟。何。妨。醉。倒。眠。紅。塵。擾。擾。愁。獨。醒。常。恨。不。
封。到。酒。泉。古。來。奇。士。奇。面。目。斬。以。形。骸。許。瓦。全。手。柱。一。杖。跛。一。足。圖。畫。神。仙。妙。並。傳。俞。成。一。左。足。因。開。元。道士。李。元。中。四。十。年。居。終。南。山。魂。返。七。日。失。其。魄。得。餓。李。尸。附。無。端。豈。是。君。身。有。仙。骨。果。然。辟。穀。得。霞。餐。君。謂。修。真。太。艱。苦。舉。杯。一。笑。樂。陶。然。笑。我。本。來。非。真。相。形。隨。影。兮。墜。區。寰。夢。化。栩栩。來。春。蝶。殼。脫。蠕。蠕。出。秋。蟬。推。之。飛。潛。與。動。植。莫。非。大。造。理。盤。旋。安。能。長。拚。此。血。氣。飲。酒。食。肉。費。萬。錢。頓。耗。精。力。腐。草。木。漸。使。荼。毒。穿。腸。肝。身。不。我。有。心。我。有。何。以。策。乎。心。所。安。爲。臣。當。忠。子。當。孝。人。世。自。具。不。解。緣。一。朝。完。身。歸。太。古。斯。情。賴。有。酒。杯。寬。壺。公。歲。月。壺。中。久。合。與。徜徉。卅。六。天。遙。望。宮。闕。森。瑤。島。俯。瞰。世。界。幾。大。千。是。時。羣。仙。皆。廟。側。桐。君。橘。叟。訥。不。言。守。此。智。珠。勿。復。失。便。是。壺。天。九。轉。丹。奚。待。瑣。細。談。元。妙。愛。護。寶。鼎。和。元。田。我。聞。此。言。亦。領。首。酌。以。大。斗。開。歡。顏。有。酒。學。仙。無。酒。佛。此。情。此。理。何。拘。牽。酪。酏。終。日。樂。吾。樂。固。非。學。佛。亦。非。仙。

初夏南郊晚眺用洛翹韻

讀書長晝得餘閒。步出郊原未掩關。曲澗綠陰人汲水。半林紅日鳥還山。境由心靜多成趣。詩爲情真未肯刪。茅屋幾家歡父老。從知化雨早來頒。通。野。人。家。爭。迎。程。姚。兩。學。博。

送芝生歸山陰

聚散會。有時。離合。本。難。必。所。苦。送。行。人。纔。逢。又。惜。別。我。與。俞。子。交。交。新。不。數。月。作。詩。道。性。真。對。酒。樂。坦。率。

金華富山水。合住神仙窟。豪興遏青雲。高談霏玉屑。君本慧業人。浮華已屏絕。痛癢重民生。讀書兼讀律。霖雨出世心。舟楫致君術。兀坐風月宵。此念時蘊結。同有倚閭親。白雲悵遼闊。蒼樹忘憂難。得是愛日。有鹿鳴高秋。烈士志未滅。十年書劍成。誓不甘蠖屈。荷塘繫歸帆。山徑馳車牽。祖餞起驪歌。聲情俱寥豁。君愛我最深。臨歧語不出。大地隔形骸。天機連活潑。行我心所安。春華期秋實。浩哉至理言。小儒聞咋舌。把晤明聖湖。酒熟蕪羹滑。後日慰相思。此願如飢渴。

問高齊齋詩存

民國四年三月游吳興之靈山

上虞許家惺 默齋

荒涼古剎幾何年。山不在高祇在仙。雙柏庭前游女集。五松亭畔醉人眠。峯幻隱隱藏邱壑。巖隙時時露石泉。相傳有九曲十三泉諸勝臥地蒲牢尋款識。依稀萬歷四年鐫。

登湖州道場山

道場山色鬱蒼蒼。蕭寺鳴鐘在上方。茗水東來流蜿蜒。太湖西望勢汪洋。浮圖矗立千年古。石磴盤旋百丈長。安得避秦逃世外。心頭哀樂兩相忘。

雜俎

俄國戰時之救濟事業 (續)

王調生譯

至於彈丸下邑。雖無公共團體。任提倡之職。然人民仍各以少數金錢。或純粹義務。設立醫院。試就克夫徵之。其地醫院之成立。始僅由婦女會倡捐數千盧比。繼覓得四層樓空屋一幢。集鄉婦及老年教員之助力。任清潔之事。假商店及居戶之臥榻。用爲病牀。終成一極大之醫院。能容傷兵三千五百名云。

愛克梯怒之住民。則集合其地之愷勒會。(愷勒乃愛克梯怒長官名。日俄之役戰死。住民因立愷勒會以誌紀念。)籌議賑濟貧民。援救傷兵之事。在會員役。概能熱忱任事。因音樂會富籤票及演劇之法。收得金額甚鉅。既創設時疫病院五十所。復資助本省在役兵士家屬。使之無憂凍餒焉。

更有鄉村數百。請願量能籌設五具至十具病牀之醫院。俄政府因轉送傷兵於各僻地。其事至難。遂拒却之。鄉民乃更請將輕傷兵士分置彼等家內。由其調養衣食。以至痊癒。如奈卡夫省某邑。有鄉村住民八十八戶。領百五十傷兵。膳宿家中。待其痊可。卽其一徵也。

尤可注意者。俄人救濟同胞。負責既如許之鉅。而對於比利時塞維亞波蘭。靠開塞各地被難流落之人。仍能兼顧不稍忽視。雖在鄙野村落。遇有比利時之亡人。未嘗不加眷顧。其他波人塞人亞米利亞人。靠開塞人。凡轉徙零落者。各大城鎮。皆設會資其飲食衣服俾克生活。聖比得斯堡有塞人救濟會一所。公

爵海倫夫人所經辦也。不特收受民間衣食金錢無算。復由省議會捐款五萬盧比。斯會暨莫斯科救濟會。且常運送衣服食品於波蘭。靠開塞等處。以賑濟其地之飄流難民也。

政府對於人民籌辦救濟熱心與否。不甚注意。自一九零五年國內現革命暴動之後。政府對於人民會議。社會改良之事者。極表示反對。屢次令禁各省議會聯合議事。迨戰雲既起。斯之政見。乃不得不稍更易。蓋充官吏之辦事能力於戰事之籌備。仍恐未能處理盡善也。惟政府官吏不信任人民會議之心。仍如故。昔彼現時之許人民集會者。徒以官吏之毅力及智慧不足。應戰時之機變耳。故俄皇現雖授權各省議會縣議會得聯合經營救濟事業。而各部官吏之敵視民權主義。仍宛如昔日也。

一九一四年秋間。克留格省議會決定勸令境內人民代播種在役兵士之田。其公函既作成。對於人民稱爲「公民」。迨將此公函送致省長請其裁可時。省長之答詞如下。「使汝等作下列之改正時。余對此勸令。卽無不贊成。」(一)公民之業農者。改爲同胞之業農者。(二)凡我公民。改爲凡我俄羅斯人民。(三)吾曹心之堅毅。無殊於俄國他處公民之心。改爲吾曹心之堅毅。無殊於俄國他處農民之心。

克留格省議會接斯答詞。大爲激動。乃決定向元老院提訴訟。請其判斷。稱人民爲「公民」。之是否違法。斯克留格省長之行爲。自當推爲俄國官吏野蠻專制之一徵。而俄官吏之若是者。爲數至多。中央政府并不加以約束。予以訓誡。蓋現時公理。雖認其行爲之逾分。而彼官吏方自信對於越分。自稱「公民」之拒斥。乃正當之行爲也。

現時俄國官吏對於國民救濟事業奇異可注意之舉動更有取締經濟會社所設醫院書室之事初塞斯脫甫地方之醫院內有一兵士創傷就痊乃苦沈寂頗思二三故人與之情話自由經濟會社聞知斯事遂議創設閱書室於各醫院藉破傷兵之寂寥一九一四年秋間乃於各地醫院內設立閱書室八百三所總計藏書五十萬卷藏書既多關涉民主自由主義之撰著自亦多所廁列各省長官聞之乃大驚譁羣詆經濟會社所設書室足以誘亂克斯克省長官墨拉脫夫至宣言書室中多種書籍使兵士寓目猶之以香豔詞曲使仕女寓目其足以敗壞道德實無疑義遂馳函省議會市鄉議會及各醫院禁其陳列厥後蔡立告夫地方有於醫院中陳設地圖戰報等品藉悅傷兵之日省長官亦加禁止蓋俄國官吏固以愚民爲要訣也

顧俄國官吏之威權可以施於本邦而不可推及外國其在國內遇有倡議民權書籍可以禁刊印可以禁購閱至於國境而外卽非其權力所可及以故俄兵之被捕爲俘虜者幽居異國反獲購閱書籍之自由勿論其書之論民權論自由閱之皆無忌諱而俄兵亦專心致意於斯雖鄙野不識文字者亦皆環聽識文字者之朗誦藉拓心胸昔日俄之役俄兵之俘於日者五萬人皆如是以致開化使近時之戰役延長年許俄兵之俘於敵者較之日俄之戰或且十倍俘虜幽居之所竟成自由問學之場豈戰爭足以播文化耶抑專制淫威有時而窮也

(完)

長姊韓氏事略

汪恩琦

長姊韓氏。性純孝。篤友于。平生不妄言苟笑。待人以厚。御下以寬。賢淑之名。夙著鄰里。先母胡宜人。尤鍾愛之。因擇壻苛。年二十七。尙未字也。癸卯八月。余母棄養。病時之侍奉。歿後之毀傷。實倍蓰於余。厥後家務。悉賴支持。而余父以姊氏標梅已過。急選雀屏。遂適韓君仲卿。於乙巳三月上巳結婚。詎仲卿早患癆。其祖母與其母。明知仲卿之不起。亟欲爲之授室者。徒爲似續計。而我家未知也。姊氏過門後。侍二老。撫諸姑。調護病人。無敢或怠。翌年春。仲卿病革。姊則求醫問卜。禱告神祇。衣不解帶。目不交睫者。歷若干晝夜。然卒無效。至三月三日。仲卿去世。距出閣期。適期年不爽一日。豈天命使然歟。抑人事之未盡耶。其時姊欲以身殉夫。余乃曉以二老在堂之大義。姊遂茹苦視息。勉盡婦道。而猶不得堂上之歡。於是悲憤鬱結。病根從斯伏矣。庚戌春。亦得肺疾。咳痰有血。老父恐其成疾。邀回醫治。嗣後旋發旋愈。己酉夏。父肩患一瘡甚劇。至中秋後。獲瘳者。皆姊氏調治之功也。余於是年三月成室。一切咸賴吾姊襄助。壬子秋。長子克熙斷乳後。卽歸姊撫領。今已五齡。此數年內。出入顧復。備極劬勞。方圖後報。乃去臘復患咳嗽。初不經意。不期於今年二月八日夜膳後。依舊操作。迨就寢。已十時半。驟然咯血三日。竟瞑目長逝。嗚呼痛哉。姊氏生於前清光緒四年戊寅十月一日戌時。歿於民國四年乙卯二月八日亥時。得年三十八歲。余同懷三人。次姊適貝氏已先歿。茲僅余一人。感懷骨肉。能不悽然。以吾姊秉性賢淑。篤於倫理。而命蹇時乖。復不永於年。以獲其報。詎不悲耶。爰紀其事。以告當世鴻碩諸君子。倘蒙矜恤。寵以詩歌。傳誄藉光泉壤。則感且不朽。民國四年乙卯三月二十七日吳縣汪恩琦述。

筆記

仰亭攀柏居筆記 其圖二筆

上虞許傳霈竹雨

螯蜞螯

畢吏部持螯酌酒爲千古美談。而所以不曰持蟹。必曰持螯者。或以爲蟹之佳處在霜。螯言螯而蟹在其。中。此說未嘗不是。今見奉賢專市蟹。螯竊有會於持螯之說也。海蟹一名橫甲。其背形如摺扇面。末二跪薄扁如小舟之划槳。雙螯無毛。間有左右大小不同。吾浙甬東亦有之。所賣之螯乃出小蟹如螯蜞者。每蟹必有一巨螯。幾與橫甲相埒。由近海居童。值退潮時拾取。每折其螯。輒棄置海。緣蟹敦味苦。與螯蜞又不類。食之無取。仍置水中。螯可復生。然則天生此蟹。專爲此螯。煮螯既熟。紅潤可愛。肉脫而白。盈筐喚賣。不絕於耳。或卽吏部左手所持之物乎。

自鏡語

山陰陳晝卿觀察。錦登道光己酉賢書。官山東濟東泰武臨道。著有學廬自鏡語。多從閱歷來。因錄其尤精切者。曰人稟二氣爲生死。陽舒陰慘是也。顧亦有死於陽者。聰明生氣也。苛刻則死。洞達生氣也。伺察則死。強毅生氣也。恣睢罔忌死。坦白生氣也。發洩無餘死。勁直生氣也。剛愎自用死。又曰詞華太重。累文字者也。世故太深。累性天者也。此等人遇著大事。心思志力。總按不到切實地步。又曰酒以合歡。偏失歡。

藥以已疾。偏致疾友。以規過。偏叢過。仕以救貧。偏患貧。又曰。人猶良苗。改過遷善。耘耔也。積德累仁。培養也。讀書好學。灌溉也。三者胥同。而實有多寡。稂有蚤。莫者得於天者。有厚薄之不同也。又曰。拒人之請。而出以決絕。辨己之屈。而加以矢誓。聞人之過。而繼以譏笑。道人之怨。而重以詬詈。其人之無度可知。又曰。才幹過人。而不失之滑。精明過人。而不失之刻。質直過人。而不失之麤。嚴毅過人。而不失之暴。恬靜過人。而不失之懦。美材也。又曰。人能知人之過。未有不知己之過者。祇是有心怙短。便又想出多少。自爲解免。對人掩飾之方。此等人永無長進。昔人謂掩飾欺人。解免欺己。欺人者。人絕之。欺己者。天絕之。又曰。好勝之心。不可無。但問其所好之勝。內乎外乎。氣乎理乎。虛名乎實學乎。其所勝之人。賢乎愚乎。邪乎正乎。君子乎小人乎。又曰。信內無孝子。譽兒無嚴君。寵僕無好官。以此觀人。百不失一。又曰。厭薄世故。是宋儒極卓絕語。其實太不世故。不可以處世。不可以處世。卽不可以成事。韓魏公知歐陽永叔不信易繫爲孔氏書。在中書終年。未與言易理。亦何嘗不世故。與又曰。天下事。有我所欲言。而人先言之。我所欲爲。而人先爲之。亦快事也。乃或從而妒之。甚且倖其不成。而設計以敗之。何哉。又曰。忍氣節。慾是懸厓勒馬工夫。再走一步。便入萬丈深坑。祇要立得住。就好。若改過。則徑須回頭向裏走矣。又曰。遇事有不可不爭者。但善爭者。令人從而。不我怨。不善爭者。令人怨。而不我從。此其道有二。曰說理。透立言。和。又曰。人家子弟。讀書之餘。有數事。必須理會者。曰農。桑。曰會計。曰岐黃。一旦出而問世。著實有用。

家庭不務施報

自鏡語有云。孝是立德事。非施報事故。曾閔王祥。非毛裏之親。獨立人倫之極。良以吾性中自有此一團天理。怨固不沒。恩亦渾忘。必謂恩勤之可感。而等施報於途人。反是以思將有不忍言者。又自敘幼學錄。謂當嫡母曹棄養。治喪厚殮。謂附於棺者。他日富貴。可補附於身者。他日富貴。不可補人。遂有稱予事嫡如生爲難能者。予大愕曰。某兄弟生三十年。從未見及此何意。乃爲諸君洩之。雖皆自明所見。足以提醒流俗。夫務施報。雖次於立德。要皆指人間酬酢往來者言。非家庭骨肉之可例。家庭純是天性用事。如何參得人情。詩言欲報之德。昊天罔極。亦就人情所易知者形容。其難報若以天性論。父母亦無所謂德也。德且不務。更何論報。誠以人子之身。卽父母之身。竭此身之心力。無異父母自竭心力。絕無痕迹於其間。如歲時薦祖。薦乎此心之不得不薦。初非若市儈之祀財。神農氏之祀田。祖專祈福於祀時也。薦祖不可言祈禱。猶事親之不必言施報。


朱學正軼事

餘姚朱學正諱文治。官海寧州學正。每晚必手疊所脫衣。端正而後就寢。及年七十餘。偶忘之。自以爲大失。數日不怡。見山陰陳氏自鏡語。陳謂疊衣事。效之未十日。卽復遺忘。其不如古人。乃爾竊謂此類事。雖細。大見人品。福量之所在。先儒作字必正身。謂卽此是學。猶此意也。

崑山半繭園

園在崑山之東城橋北。當前明葉侍郎居第之東。侍郎名盛字與中。登正統十年進士。以學行政績高英。憲間。園舊名春玉園。嘉靖丙午侍郎之元孫舉人名恭煥字伯寅。闢治之。伯寅之孫工部主事名國華拓地二十餘畝。合園之修廣六十畝。如繭形。甕大。始名繭園。有大雲堂。唐亭。小有堂。據梧軒。霞笠綠天徑。樾閣。煙鬢樹。梅花館。春及軒。諸勝處。崇禎八年。掘地得泉。色白味甘。號曰白泉。賦詩屬和甚多。陳瑚序之。陳有十詠律詩。無梅花館春及軒。而有濠上舒嘯二題。或館與軒後成之耳。工部晚年當清初時。析園爲三。以與子。其仲子名奕苞。得東偏之半。葺而新之。因名半繭園。陳維崧有賦。半園位置。小有堂橫踞前後兩假山間。適居其中。姜宸英有小有堂記。奕苞以博學鴻詞就徵京師。久而思歸。屬施閏章作春及軒記。謂軒上有樾閣。下臨官河。其東則良疇數畝。種秫釀以待客。周迴小溪。溪東爲古寺。松檜攫拏。皆數百年物。跨溪而入石磴。冷然登閣。而望山翠。蒼然軒正面。田疇遠。風披拂。蓋紀實景焉。疑在今樾閣之東南遺基。園中樓閣均燬於咸豐末年兵燹時。光緒十一年前令李君福沂重建樾閣。園丁借以賣茶。余與同人時登之。憑窗四面。各饒風景。其東面田疇。古木石磴。猶如施記所敘。余別有始末記。

上海 滙豐銀行 及虹口分行告白



啓者本行收足資本洋一千五百萬元
 公積英金值洋一千五百萬元又銀洋
 一千八百萬元共合洋三千三百萬元
 另議定備用股本洋一千五百萬元總
 行開設在香港分行在倫敦廈門暹羅
 包帶維亞孟買加拉吉打古隆北廣東
 福州德國漢口愛巴軸化神戶古喇喇
 伯長崎意陸伊羅法國買拉夾呂宋紐
 約檳榔晏貢西貢舊金山新加坡蘇拉
 巴亞天津青島北京橫濱其上海行與
 各商往來暫存本行之銀及定期存款
 等均請至本行面議代付本埠匯票並
 辦理銀行一切應辦事宜匯票可以匯
 至倫敦歐洲印度新舊金山美國中國
 東洋等處大通商碼頭特此佈聞
 民國三年十一月十日

北京呂筱山君夫人之證書



呂筱山君夫人之玉照

由是觀之可知韋廉士大醫生紅色補丸確能生長稠濃之新血其療治婦科之神速有如此也

北京前門外楊梅竹斜街月中桂香粉號主人呂筱山君來函云

內子因產後失調漸成經閉之症或二三月一通或四五月不至將成血枯經閉之疾

遍請中西名醫診治功效毫無甚至飲食不思精神困乏凡癆疾之象悉見病入膏肓矣

聞韋廉士大醫生紅色補丸之治疾無不藥到春回即向老德記藥房購取六瓶使內子試服乃藥未及半而病已大減遂連服之諸症皆失脫然無累自此飲食加增精神煥發數倍於前行兒昔日羸瘦之軀今忽變為肥胖之體見者無不驚喜

今則立等
治愈爾
之疾
病



韋廉士大醫生
紅色補丸既已
治愈彼之疾病

凡經售西藥者均有出售或向上海四川路八十四號韋廉士醫生藥局函購其價每一瓶大洋一元五角每六瓶英洋八元無論遠近郵費一概在內